

兒易內儀以

此據粵雅堂叢書
本排印初編各叢
書僅有此本

跋

先生見易成。天下以爲倪氏易矣。夫易追元入冥。放乎沕寥。若號專門。必乖通變。商瞿受業。田何繼之。波沿于焦贛。瀾助于京房。神奇自夸。猶云小成。何則。易非一流之道。讀易者亦非一家之言。不知其義之闊遠。并包。僅成識緯卜筮之術。可歎也。先生冥心十載。氣變之盈虛。陰陽之消復。靡不畢察。跡其所言。上及太清。下游淵壘。昆崙旁薄。歸於極深。今夫聖人之書。君子小人之龜鏡也。君子小人畫一分區。則易書不可得作。而小儒曲學。至以此測占機事。私便其身。此堯夫所以諱傳邢七也。司馬君實。宋之所謂大賢也。以太玄之方州部家。爲可紹易。作說玄數千言。然則司馬氏之潛虛。豈爲知易者哉。先生慮知易者鮮。擢兩儀之筋髓。以嚼乳屯蒙。然安得人盡甯馨。同游象始乎。東坡易解成。止付錢子曰。慎勿示人。先生矜慎之意。雅同坡公。廣之剗劑者。以繼城君爲之固請耳。乃其命名本旨。似欲嬰孩天下。歟。抑漢兒千乘本作倪先生說易以課伯溫。又何不可謂之倪氏易也。

門人王鯤敬跋

兒易自序

漢人說易。舌本強擻。似兒彊解事者。宋人剔梳求通。遂成學究。學究不如兒。兒彊解事。不如兒不解事也。古今諺識。多出兒口。卽易寄靈。任兒自言。必能前知矣。夫易固貴兒。所以藏身。大藏藏筮。小藏藏兒。筮亦聖人兒天下也。天下甚危之言。以爲兒爲之。則可無禍。屯之次乾坤。此易告難也。繼屯以蒙。蒙童是兒。此易明言惟兒足支難耳。子雲太玄。童烏共之。童烏者。子雲九歲兒也。崇禎辛巳夏五。

兒易內儀以說

三聖人之易。斷於仲尼。三聖人治體。仲尼治用。治體握規。治用握矩。文周以前。人皆任質明量。取乎易者。槩必君子。故貴以其圓神命易。使人知化。至於衰周。權智日出。苟使易兩在遷流。則大賢大奸。共用易矣。大賢大奸。共用易。即必有非易之易。起而亂易者。仲尼懼夫圓神敗易。故尊典常。矩易使方。分設六十四者。卦執一德。循能責用。猶官畔然。故大象之曰以者。言乎其用也。仲尼用易。如丹制汞。使就財實用。豫治樂。豫盡卦皆歸樂用。革治歷。革盡卦皆歸歷用。師萃治兵。師萃盡卦皆歸兵用。噬賁豐旅治刑法。噬賁豐旅盡卦皆歸刑法。仲尼之使易也。器之易之應之。猶響也。觀其周綜卦德。博串彖爻。疑有神靈。通乎夢見。此繇仲尼制思微密誠察。而其詞體要。執術馭踐。斷以數言。包囊全卦。譬畧一寸。符籙千里。夫子之文章。其才大力多然也。我不敢知。曰文周所謀。定由斯義。而自仲尼用之。何容文周不爲此謀乎。是故學易者。不可以不明大象。離象求易。卽力竭而思不得盡矣。夫易者。千世學者之所聚爭也。聚千世之材。爭立一易。甯有正易乎。而又以抵程朱之議。爲有罪。今取諸仲尼之義。明不敢自用才。萬或文周討叛。仲尼必爲之辭。而挾仲尼令程朱。程朱俛首矣。是故其道得明而易行也。

兒易內儀以或問

或問原始之謀。宜尊卦德。今多脫屑。不費推尋。是則包犧無所發義也。曰。卦之爲德。攬象已章。研串營綜。程朱爲盡。本授象旨。以釋卦情。既使義尼通其繩貫。不宜又參擬議。取誚駢枝。夫毀所已工。矜其未及。是妄人也。僕何敢焉。

或問彖傳明卦。小象申爻。遺此二者。譬則車無輔轂。或有不合。何以行之。曰。仲尼以彖傳存凡。象爻取別。凡虛而攝。別細而分。大傳中權。源通流匯。握蛇得寸。餘無可求。循義求之。亦何不合。苟使靜會。卽得玄通。當所迂游。彌爲切洽爾。

或問吉亨貞利。是曰嘉徵。咎悔厲凶。斯明禍應。義類致一。無可遷流。今各爲詞。則占者失據矣。曰。八者之立。非必占也。吉云君子。凶卽小人。悔亡考衷。无咎補過。隨文立義。詎有定辭。如晉六五先陳悔亡。後發其義。又萃九四空稱大吉。不白所由。占以應事。豈有未事先占。事以發占。何爲有占无事。斯知八言道廣。非可扶繩。

或問文王作彖。周公陳爻。彖爻相生。卽猶父子。今先徵爻義。後及彖文。斯已倒行爲迷支本。曰。卦必尊上。畫必親初。祖以其尊而遡祥居後。禰以其近而追崇處先。今以仲尼上求三世。先其近者。宜始自爻。苟越爻求彖。是猶舍麓趨巔倒行。在茲不在彼矣。

兒易內儀以
虛同

右四則

兒易內儀以目錄

卷之一

乾

屯

需

師

小畜

卷之二

泰

同人

謙

隨

臨

卷之三

兒易內儀以目錄

坤

蒙

訟

比

履

否

大有

豫

蠱

觀

兒易內儀以目錄

噬嗑 賁

剝 復

无妄 大畜

頤 大過

坎 離

卷之四

咸 恆

遯 大壯

晉 明夷

家人 睽

蹇 解

損 益

卷之五

夬 姤

萃 升

卷之六

困 革 震 漸 豐 巽 渙 中孚 既濟

井 鼎 艮 歸妹

旅 兌 節 小過 未濟

兒易內儀以卷之一

明 上虞倪元璐著

乾

乾元亨利貞。○初九潛龍勿用。○九二見龍在田利見大人。○九三君子終日乾乾夕惕若厲无咎。○九四或躍在淵无咎。○九五飛龍在天利見大人。○上九亢龍有悔。○用九見羣龍无首吉。

象曰：天行健，君子以自強不息。

儀曰：君子以自強不息者，何也？仲尼見乾象象之辭，皆爲進德修業而設。學問始事，以不自用爲功。繇其氣志未發，無可據持，是爲潛龍勿用也。繼此聰明漸出，龍蟠欲見，凡道高遠，皆見端卑邇，故曰在田。其志必求得乎大人之學，而庶幾遇之。故曰利見大人。繇此致功，朝乾夕惕，操慮艱危，以求塞咎。又繇此上達，躍在淵矣。龍與淵漸，時至自躍耳。於是窮際詣極，飛而在天，以大見其學，致其身於大人也。二之大人，在人而已，利見之。五之大人，在己，而人利見之。如此則可謂自強，道成名立者矣。顧其求道之深，懼乎矜負爲累，故不見高見亢，不形喜形悔，自視其學，凡諸備美，皆爲未極，不足尊尚。此爲見羣龍无首也。首尾無端，終則又始，乾乾惕惕，莫知所底，安得息乎？莫強於龍見无首，故知不息也。文王曰：元亨利貞，元亨利者，自強也，貞者，不息也。周公亦猶因象發爻耳。

坤

坤元亨利牝馬之貞。君子有攸往。先迷後得主。利西南得朋。東北喪朋。安貞吉。○初六履霜。堅冰至。○六二直方大。不習无不利。○六三含章可貞。或從王事。无成有終。○六四括囊无咎无譽。○六五黃裳元吉。

○上六龍戰於野。其血玄黃。○用六利永貞。

象曰：地勢坤。君子以厚德載物。
儀曰：厚德載物者何也。此仲尼觀象之審也。凡厚必以薄爲基。霜凝而冰。薄積而堅。漸趨厚也。地厚德盛。直者如矢。方者猶輿。大者爲塗。此皆因性之利。不假功能。溥博如天。出乎自然。若乃弢光不耀。居勞避成。守口矯輕。補過逃咎。其爲色也。辭玄取黃。其在體也。辭衣取裳。篤順致恭。委身利用。如此者。德甚厚盛。或懼其出於陰柔也。夫苟周公之取乎坤德者。以其陰柔。則仲尼言地不曰地勢。言德亦不曰載物。勢則其氣載。則其力也。是故不獨乾德龍。坤德亦龍也。健而能戰。戰者法制教令。銷萌禁非。董之用威。血流取創。顧以其戰不于朝。亦不于國。亦不于疆場。郊牧曠遠。神行其間。使民由之。不必知見。又其血色不正。赤而玄黃。玄黃者。天地之色。如此卽是兩間元氣。非血也。雖甚威行。無傷其厚。故可以永貞。載物不墜也。進而求之。維文王之見。亦猶此耳。象曰：利牝馬之貞。馬載物者也。牝順歸厚。曰主利。惠及物也。曰先迷後得。盛德若愚。卒不失道也。曰西南得朋。東北喪朋。西南坤也。東北艮也。爲地卑坦。不爲山崇險。豈非厚乎。

屯

屯。元亨利貞。勿用有攸往。利建侯。○初九。磐桓。利居貞。利建侯。○六二。屯如遭如。乘馬班如。匪寇婚媾。女子貞不字。十年乃字。○六三。即鹿無虞。惟入于林中。君子幾。不如舍。往吝。○六四。乘馬班如。求婚媾。往吉。无不利。○九五。屯其膏。小貞吉。大貞凶。○上六。乘馬班如。泣血漣如。

象曰。雲雷屯。君子以經綸。

儀曰。君子以經綸者。何。仲尼見屯象。象皆用人理財發號施令之事。故言之。何言乎用人也。初曰磐桓。利居貞。猶曰徐之無動也。處屯閉塞。百無利者。惟利立賢耳。遭如猶磐桓也。乘馬班如。班如者。言有行列。此禮賢之儀。詩曰。良馬四之。良馬五之。天地閉。賢人隱。當是之時。天子所不得臣者。三。女貞不字者。一也。莫爲之容。如鹿无虞。稿林中者。二也。辟色見幾。作而舍去者。三也。然君子以爲此由在我。未嘗誠求。苟誠求之。烏必無應者乎。莘野承聘。渭濱同歸。幣往車來。婚媾之美。詩曰。爾公爾侯。逸豫無期。得賢樹藩。往无不利。經綸之大者也。何言乎理財。財有宜生。財有宜散。屯膏小貞。積貯爲功。故吉也。詩曰。廼積廼倉。屯膏大貞。培克召禍。故凶也。詩曰。如賈三倍。生財之道。有利無禍。是亦經綸也。何言乎發號施令也。禹湯罪己。義激萬方。輪臺奉天。亦以救敗。乘馬班如者。馳使四出也。詩曰。我馬維駒。泣血漣如者。哀悔誠告也。詩曰。王曰於呼。激世之權。以虛制實。是亦經綸也。聖王之制。經綸握簡。務急三者而已。急又有急。歸乎用人。故象惟曰建侯也。勿用有攸往。亦猶曰磐桓也。元亨利貞。

以乾全德予之。蓋其重耳。不曰用賢曰建侯。此明周祚之延八百。封建之功。而唐之大憂不係藩鎮。藩鎮強而唐存。藩鎮弱而唐亡也。

蒙

蒙。亨。匪我求童蒙。童蒙求我。初筮告。再三瀆。瀆則不告。利貞。○初六。發蒙。利用刑人。用說桎梏。以往吝。○九二。包蒙吉。納婦吉。子克家。○六三。勿用取女。見金夫。不有躬。无攸利。○六四。困蒙吝。○六五。童蒙吉。○上九。擊蒙。不利爲寇。利禦寇。

象曰。山下出泉。蒙。君子以果行育德。

儀曰。果行育德者。何。此以初言發蒙。發者毅辭也。威立法行。後乃脫桎。果之義也。二曰包蒙。包者優辭也。納婦著和。子克家著順。育之義也。上曰擊蒙。擊厲而銳。視猶強寇。果之義也。五曰童蒙。童。恕而通。與爲嬰兒。育之義也。而其間三曰勿用取女。見金夫。不有躬。以利墮行失。在不果也。四曰困蒙吝。拘迫過苦。失在不育也。其在彖曰。初筮告。乘其專敬。則急應之。亦爲果行也。再三瀆。瀆則不告。以其躁數。則靜需之。亦爲育德也。是故古聖人之治蒙者。伊尹周公是也。伊尹之訓嗣王也。其辭厲曰。予不狎于不順。是爲知果行者也。周公之誨孺子也。其旨和曰。永觀厥子。懷德是爲知育德者也。

需

需。有孚。光亨貞吉。利涉大川。○初九。需于郊。利用恆。无咎。○九二。需于沙。小有言。終吉。○九三。需于泥。致

寇至。○六四。需于血。出自穴。○九五。需于酒食。貞吉。○上六。入于穴。有不速之客三人來。敬之終吉。
象曰。雲上于天。需。君子以飲食宴樂。

儀曰。飲食宴樂。不可以著教。仲尼觀于需之象。象而悟其事。亦教也。故曰。君子以飲食宴樂。今夫郊野至曠。而可以同人。詩曰。之子干旄。在浚之郊。麗澤爲悅。而可以取友。詩曰。所謂伊人。在水之湄。需于郊者。僻處而可恆也。需于沙者。近險而無懼也。君子宴樂。必有其地焉。其所畏者泥耳。泥必致寇。詩曰。微君之躬。胡爲乎泥中。是故泥者。宴樂之災也。大烹雖費。而可以養賢。詩曰。醕酒有衍。籩豆有踐。壺殮雖微。而可以得士。詩曰。飲之食之。教之誨之。嘉會而陳八簋。禮正故吉也。入穴而敬三人。義至亦吉也。君子飲食。必有其道焉。其所惡者血耳。血必自穴。詩曰。余未有室。家鼠思泣血。是故血者。飲食之禍也。由此觀之。君子未有廢飲食宴樂者。君子節飲食。不樂宴游。皆爲泥與血言之。故曰。有孚。光亨。貞吉。利涉大川。此亦言乎飲食宴樂之事。苟其情孚道光。義美禮正。不爲其泥與血者。又何險之慮乎。聖人尊俎以折衝。游休以彌性。飲食宴樂。則無大川。是故郊沙酒食。泥血六者。不可不辨也。卷阿漆沮。郊之與沙也。岐洛表十句。不返泥也。鹿鳴魚麗。酒食也。我用沉酗于酒。血也。

訟

訟。有孚。窒惕。中吉。終凶。利見大人。不利涉大川。○初六。不永所事。小有言。終吉。○九二。不克訟。歸而逋。其邑人三百戶。无眚。○六三。食舊德。貞厲。終吉。○九四。不克訟。復即命渝。安貞吉。○九五。訟元吉。○上九。或

錫之鞶帶終朝三褫之

樂曰天與水違行訟君子以作事謀始

儀曰違行者天健水柔以健始而以柔終故以之謀始謀始者言但可有始不當有終也夫子何故言之此以初之永不永所事二之不克訟歸逋三之食舊德從事无成四之不克訟安貞五之元吉上之終褫皆爲慎始憚終者也夫訟之爲事也何宜可永不永則其言小而終吉不克訟者克猶勝也訟不求勝而逃之猶冀保其家族耳故曰其邑人三百户无眚也享常安素不戰而守故曰食舊德貞雖危終吉訟者束身而聽王之命故曰或從王事曰无成者幸其无成也不終訟則還其正是能變其鴟義轉危即安故爲復即命渝安貞而吉元者始也始吉以其不終凶五者之于訟皆有始无終故皆得吉也若夫終訟者之情不過以訟勝爲榮以訟勝爲榮雖榮必辱故爲錫鞶帶而三褫也由此觀之天下之道始必有終惟訟所謀獨宜始耳象曰有孚窒惕中吉終凶此言慎始者吉窮終者凶利見大人不利涉大川此猶虞芮質成以見大人爲利而終於交讓而退不終訟而犯險也昔者先王之制刑期于無刑教戰期于不戰凡其威克猛起之情皆聚于始固不欲其有終耳

師

師貞丈人吉无咎○初六師出以律否臧凶○九二在師中吉无咎王三錫命○六三師或輿尸凶○六四師左次无咎○六五田有禽利執言无咎長子帥師弟子輿尸貞凶○上六大君有命開國承家小人

勿用。

象曰：地中有水，師。君子以容民畜衆。

儀曰：容民畜衆者，何？此仲尼以師之器毒，而見卦象所陳，皆不窮戰之事，故不欲後世用之，攻擊虛劉而用之容畜。曰：以容民畜衆也。師出以律，否臧凶者，此如詩之曰：不留不處，三事就緒。又曰：我服既成，于三十里，出不妨農，行不疲衆，蓋真有律之師，律者所以容畜也，不以律則必騷民衆，故不臧而凶也。在師中吉者，此如詩之曰：言念君子，溫其在邑，師不四掠而中處在邑，不著威著溫，是所容畜者多也。王三錫命者，此如詩之曰：告于文人，錫山土田，宣王之錫召虎，爲其疆理，旬宣能容畜其民衆而錫之，不以其滔滔洸洸錫之也。師或輿尸凶者，此如詩之曰：祈父，予王之爪牙，胡轉予于恤，靡所止居，蓋爲不愛其民衆而輕驅之死地，聖人之所惡者也。師左次无咎者，此如詩之曰：古公亶父，來朝走馬，率西水滸，至于岐下，太公避狄，不戰而徙，皆爲民衆也。田有禽，利執言，无咎，長子帥師者，此如詩之曰：薄伐玁狁，至于太原，文武吉甫，萬邦爲憲，吉甫，長子也。薄伐者，執言聲罪而已，不必窮威以殃民衆也。弟子輿尸，貞凶者，此如詩之曰：今也日蹙國百里，於乎哀哉，維今之人，不尙有舊，不用舊德而用弟子，以致喪師，蹙國棄其民衆也。是故有王者起，無論創業開國，守成承家，其所著令必錫師中而黜弟子，弟子者，小人也。由此觀之，師何可以不屬丈人乎哉？丈人者，老成持重之稱。趙充國曰：無識老臣，金城之役，辛武賢執戰，充國執屯，戰不容民，屯以畜衆也。

比

比。吉。原筮。元永貞。咎无。不甯。方來。後夫凶。○初六。有孚比之。无咎。有孚盈缶。終來有他吉。○六二。比之自內。貞吉。○六三。比之匪人。○六四。外比之。貞吉。○九五。王用三驅。失前禽。邑人不誡。吉。○上六。比之无首。凶。

象曰。地上有水。比。先王以建萬國。親諸侯。

儀曰。建萬國。親諸侯者。何。凡封建懷柔。道先自治。有孚比之。无咎。有孚盈缶。終來有他吉者。此言存誠內治。積功中強。始于正己。終于求輔。他者對我而言。有我必有他。有天子必有諸侯也。比之自內者。內諸侯也。書曰。甸服是也。曰外比之者。外諸侯也。書曰。侯服綏服是也。比之匪人者。九州之外蠻夷之治。入子非人。書曰。要服荒服是也。所謂建萬國之義明矣。古者天子因會同而田獵。此親諸侯之事。車攻。親諸侯之詩也。其曰駕彼四牡。四牡奕奕。赤芾金舄。會同有繹。此猶言顯比也。其曰射夫既同。助我舉柴。此猶言王用三驅也。其曰大庖不盈。猶言失前禽也。其曰之子于征。有聞無聲。允矣君子。展也大成。猶言邑人不誡吉也。仲尼之曰。親諸侯。取諸此矣。然又曰。比之无首凶者。此周公前知之道。後周公二百五十年。幽王嬖褒姒。舉烽火以戲諸侯。諸侯叛之。犬戎入犯。身死驪山。无首之占也。狎而戲之。非比之道。宜承其禍。此猶書次秦誓。以明秦必代周。詩序車鄰。以明亡秦必寺人也。此不獨周公知之。文王亦知之也。曰不甯方來者。封建千八百國。而天下歸心。文王前知武王之事。

曰後夫凶者。卽爲驪山後至而國遷。文王亦前知幽王之事也。

小畜

小畜。亨。密雲不雨。自我西郊。○初九。復自道。何其咎。吉。○九二。牽復。吉。○九三。輿說輻。夫妻反目。○六四。有孚。血去惕出。无咎。○九五。有孚。攣如。富以其隣。○上九。既雨既處。尚德載。婦貞厲。月幾望。君子征凶。○象曰。風行天上。小畜。君子以懿文德。

儀曰。懿文德者。何。此以卦德所取。僅爲飭其小德。以美聽觀。傳曰。威儀文辭之類。仲尼又玩夫象象之文。則愈知之也。初曰復自道。何其咎。復自道者。猶云道其所道。一節可見。非必經緯之文。然亦是美也。二曰牽復者。猶云進止常度。不失尺寸。不無拘牽。而不離其正也。三曰輿說輻。夫妻反目者。輿衛不閑。忿戾相加。皆爲蕩儀失容。文德之所不出也。四曰血去惕出者。血去則外無染汚。惕出則中無拘畏。潔清委蛇。文之懿也。五曰有孚攣如。富以其隣者。雖守繩斤斤。而足以表俗華物也。上曰既雨既處。方雨卽止。不傷其霽也。尚德載則非脫輻也。婦貞則不反目也。月幾望者。其華可悅也。然其道可以守己。而不可以偏物。故曰君子征凶。象曰密雲不雨。猶曰既雨既處也。自我西郊。猶曰君子征凶也。雲不降雨。文不成澤。郊拘其墟。行不及遠。是亦象乎威儀文辭之細者而言之。故曰小畜也。

履

履虎尾。不咥人。亨。○初九。素履往。无咎。○九二。履道坦坦。幽人亨吉。○六三。眇能視。跛能履。履虎尾。咥人。

凶。武人爲于大君。○九四。履虎尾。愬愬。終吉。○九五。夬履。貞厲。○上九。視履考祥。其旋元吉。

象曰。上天下澤。履。君子以辨上下。定民志。

儀曰。辨上下。定民志者。其義在履之象。爻爲甚設也。夫初。民也。二。士也。閭巷徒步。素位而行。守道樂天。幽人之事。言乎在下。則有然者也。三者。大臣之下。士民之上。直哉如矢。以致其身。眇能視者。雖不足明。而不敢託盲不視。跛能履者。雖不足行。而不敢稱蹇不履。猶言鞠躬盡瘁者也。履虎取咥。雖凶不顧。以其武人上扶大君。武人者。剛介之稱。爲者言志所向。護故曰爲于。有若黨助之者。夫子爲衛君乎是也。四大臣也。一人下之。百辟上之。其行取危。故曰履虎尾。其術取巽。故曰愬愬。伊衡姬宰。秉剛能懼。貞而禮也。五君也。尊無上矣。乾健致決。是爲夬履。由此而觀。上辨其上下。辨其下。上下之間。辨乎上下之間。此其位定而分明也。以此示民。曷敢越厥志乎。故曰視履考祥。其旋元吉。視者觀聽不迷。履者率履不越。考祥者。猶書俊民用章。家用平康。蓋云天澤之分明于國。而庶民之秀者。能明其道而用之於家。則亦平康而協吉也。其旋猶言星。其旋繞歸向。衆志不搖。故曰元吉也。此在六爻備陳。上下之義。而彖但扼中而立其辨。曰履虎尾。猶曰敢犯。此言乎下之義也。曰不咥人亨。猶曰能容。此言乎上之德也。上下既辨。民于是知下宜忠。上上宜容下。而其志定于親上終事而不惑矣。

兒易內儀以卷之二

泰

泰小往大來。吉貞。○初九。拔茅茹。以其彙。征吉。○九二。包荒。用馮河。不遐遺。朋亡。得尚于中行。○九三。无平不陂。无往不復。艱貞无咎。勿恤其孚。于食有福。○六四。翩翩。不富以其隣。不戒以孚。○六五。帝乙歸妹。以祉元吉。○上六。城復于隍。勿用師。自邑告命。貞吝。象曰。天地交泰。后以裁成天地之道。輔相天地之宜。以左右民。

儀曰。先王聖人君子。專稱也。后。槩稱也。使時王不得辭耳。裁成輔相左右民者何。此言泰交之事。取諸周公之繫爻者也。今夫泰交之隆。極于堯舜。堯獨憂舉舜。舜相堯舉五臣。治水掌火。播種弼教。明刑。皆裁成輔相天地之事。左右其民之謀。五臣一人不升。卽一事廢。拔茅茹彙。固爲始義也。夫裁成者。制過也。輔相者。扶不及也。今曰包荒。又曰馮河。馮河言勇。是用制也。包荒明量是用扶也。曰不遐遺。又曰朋亡。朋亡。決私亦用制也。不遐遺。周物亦用扶也。如此則無過不及。尚于中行。裁成輔相左右民之事。其又在此也。平者陂之。亦用制也。往者復之。亦用扶也。艱以持險。亦用制也。貞以崇正。亦用扶也。勿恤其孚。于食有福。道孚于民而衆享其休。裁成輔相左右民之事。又在于此也。翩翩者。捷于從衆。不自富而以與其隣。此爲制富之過。扶貧不及。以與民同利。帝乙尙賢。王姬下嫁。此爲制尊

之過扶率不及以與民相親于是觀城隍之反復慮秦運之難終毋敢與師動衆惟務申嚴號令遠猶辰告制殺之過扶德不及使民向方裁成輔相左右民之事其又在此也其在象曰小往大來小慮其過也利用裁成大慮其不及也利用輔相使民皆知貴陽賤陰以此掖民是亦與象同義也

否

否之匪人不利君子貞大往小來○初六拔茅茹以其彙貞吉亨○六二包承小人吉大人否亨○六三包羞○九四有命无咎疇離祉○九五休否大人吉其亡其亡繫于苞桑○上九傾否先否後喜

象曰天地不交否君子以儉德辟難不可榮以祿

儀曰儉德辟難不可榮以祿者何由知之蓋爻曰拔茅茹以其彙貞吉亨當否方交君子雖道消而其朋未喪茅茹以其彙此即秦之徒也惟秦征而得以有爲比貞而惟宜固守是爲儉德包承包羞者即秦之包荒但秦權在君子包明其量故曰荒荒之爲言大也否權在小人包失其勢故曰承承之爲言聽也秦之曰包我不屑治之耳小人見穢故曰荒否之曰包雖欲不包不可得也君子見恥故曰羞德儉至此以辟難也辟難而已豈以干祿乎雖小人欲祿君子君子必曰有命也其心僅求无咎不欲處富貴疇言其類也蓋謂茅茹諸君子離祉言與社離是爲不可榮以祿也君子不可榮以祿曷爲而辟難此知君子非爲苟免而已也固欲以道召聲類以術制小人而反否爲泰耳所以終賴之以休否而向曰小人吉者今仍歸吉大人轉亡爲存有苞桑之固終賴之以傾否而先之大

人否者。後乃有喜。陰往陽來。還小大之常。休者。否于是乎其已也。傾者。反而之泰之辭也。苟使君子不儉德。則難必及之。何能留其身以有爲。苟使君子可榮以祿。則淪胥以敗。及何能振其身以制小人之命乎。讀彖辭而知匪人之世。君子誠宜審其勢會以處此也。

同人

同人于野。亨利。涉大川。利。君子貞。○初九。同人于門。无咎。○六二。同人于宗。吝。○九三。伏戎于莽。升其高陵。三歲不興。○九四。乘其墉。弗克攻。○九五。同人先號咷而後笑。大師克相遇。○上九。同人于郊。无悔。象曰。天與火同人。君子以類族辨物。

儀曰。類族辨物者。初之于門。二之于宗。上之于郊。是其類族者也。三之伏戎。四之乘墉。五之師克。是其辨物者也。門者聚室。宗者合屬。郊者成都。族序而類也。戎者非類。攻者殊謀。克者異勢。物昭而辨也。族之類也。類之中又有類。故自其同者而觀之。門宗郊之曰同人也。自其不同者而觀之。門不同宗。宗不同郊。類而又辨也。物之辨也。辨之中有不辨。故自其不同者而觀之。我師彼戎之爲異物也。自其同者而觀之。升亦不興。乘亦不攻。號亦可笑。克亦可遇。辨而又類也。故彖括而曰同人于野。野之于郊。類也。野之于門宗。辨也。利涉大川者。此爲類族言之。其族之盛。相扶以濟。何憂險乎。利君子貞者。此爲辨物言之。其道之正。不爲苟同。何憂敗乎。

大有

大有元亨。○初九。无交害。匪咎。艱則无咎。○九二。大車以載。有攸往。无咎。○九三。公用亨于天子。小人弗克。○九四。匪其彭。无咎。○六五。厥孚交如。威如吉。○上九。自天祐之。吉无不利。

象曰。火在天上。大有。君子以遏惡揚善。順天休命。

儀曰。曷言乎遏惡揚善。順天休命也。仲尼以爻之曰无交害。匪咎。艱則无咎者。是言不交害道之人。則无有咎。以艱貞之德。治小人。則亦无咎。蓋爲遏惡言之也。又以爻之曰大車以載。有攸往。无咎者。是言尙德之載。君子得輿。賢者道行。世通才出。蓋爲揚善言之也。又以爻之曰公用亨于天子。小人勿克者。是言公者助理天下。此爲善者。小人爲惡。亨者揚之。弗克者遏之。蓋爲遏惡揚善兼言之也。又以爻之曰匪其彭。无咎者。是言履盛不驕。有所承順。曰厥孚交如。威如吉者。是言誠信通格。畏天之威。此二爻蓋爲順天言之也。又以爻之曰自天祐之。吉无不利者。是言天命有歸。榮懷安美。蓋爲休命言之也。仲尼又以象無他詞。惟曰元亨者。是以元者善之長。爲揚善言之。而遏惡可知。亨者嘉之會。爲休命言之。而順天已見也。

謙

謙亨。君子有終。○初六。謙謙君子。用涉大川。吉。○六二。鳴謙。貞吉。○九三。勞謙。君子有終吉。○六四。无不利。撝謙。○六五。不富以其鄰。利用侵伐。无不利。○上六。鳴謙。利用行師。征邑國。

象曰。地中有山。謙。君子以裒多益寡。稱物平施。

儀曰。哀多益寡。稱物平施者。蓋言聚道之多。以益物之寡。稱物之宜。而輕重布之。不失平耳。析言之。何言乎哀多益寡也。仲尼見謙初之曰。謙謙君子。用涉大川。吉者。謙之又謙。是爲聚也。德之不厭多者。謙數之寡有者。吉以謙積。謙以謙召。福聚德至。盛化險爲夷。哀益之義也。鳴謙者。著教也。周公曰。予旦已受人之微言。咸告孺子王。周公不敢曰己有微言。曰受諸人也。聚謙于己。而以其道予孺子。周公之道。多于孺子。益孺子寡也。勞謙者。著功也。舜曰。俾予從欲以治。四方風動。惟乃之休。舜不敢曰予既治之。曰乃之休也。聚謙于己。而以其功予皋陶。帝舜之功。多于皋陶。益皋陶寡也。无不利。撝謙者。精謙崇益。撝以予人。無不得益者也。何言乎稱物平施也。仲尼以爲謙之爲義。非一虛己可得而盡。夫物不同量也。禮讓之亦謙。義制之亦謙。故曰鳴謙。曰勞謙。曰撝謙者。此因物之道。勝。或其勢微而施之也。若夫強梗之徒。昧亂之國。謙謙之君子。卽仁者也。必亦有勇。故有直任君師。無所顧避。不假隣衆。殺伐用張者。六五是也。其辭曰。不富以其隣。利用侵伐。无不利。有自承過罪。動悔慙德。口無亢辭。勝兵日出者。上六是也。其辭曰。鳴謙。利用行師。征邑國。行謙之道。而可以興師伐國。此亦因物之必以征誅得正。稱其暴亂而施之。以是稱平。其謙一也。彖曰。謙亨。君子有終。夫苟不損己益人。權多量寡。因物作準。隨施取平。謙之爲道。何能致通利行終身守之而無弊乎。

豫

豫。利建侯。行師。○初六。鳴豫。凶。○六二。介于石。不終日貞吉。○六三。盱豫悔。遲有悔。○九四。由豫大有得。

勿疑朋盍簪。○六五貞疾恆不死。○上六冥豫成有渝无咎。
象曰雷出地奮豫先王以作樂崇德殷薦之上帝以配祖考。

儀曰作樂崇德殷薦之上帝以配祖考自仲尼取之而觀夫周公六象之詞無不爲冥擊搏拊言之也。初六鳴豫六二介石六三盱豫皆言作樂也。九四由豫言崇德也。亦言享祀也。六五貞疾上六冥豫皆言薦帝配祖也。何以知其然也。記曰樂由中出故靜。今曰鳴豫流辟邪散召亂致亡。故凶也。書曰八音克諧今孤主石有辨無和粗厲猛起則亦不可以終日也。記曰優侏僇獲雜子女此以豔目蠱觀謂之盱豫宜悔而遲悔則其後悔益大也。凡若此者皆爲姦聲非以崇德崇德莫如由豫由豫者如記之曰本之情性合生氣之和者是也。以其有得于心不言而信故曰大有得勿疑是可以觀德也。明盍簪者詩曰駿奔走在廟又曰厥作禠將常服黼黻助祭之朋萃衣冠於郊廟祭之事也。貞疾恆不死者貞正也疾速也。文王配帝之詩曰畏天之威于時保之此言貞也。后稷配天之詩曰其香始升上帝居歆此言疾也。自其作樂而言之凡郊天之樂圓鍾爲宮圓鍾生於房心之氣房心爲大辰天帝之明堂氣之正配此爲貞也。若樂六變則天神皆降可得而禮道之幽通此爲疾也。以是薦帝配之祖考是所以不死其祖考者詩曰文王陟降在帝左右故曰恆不死也。于是而冥豫成矣。帝曰玄冥也祖曰幽冥也豫取諸冥始知鳴不可盱亦不可也。天神協和能使氣移變災疾不作故曰有渝无咎也。由此而觀文王之曰利建侯行師者亦其義爾。微子之命曰惟稽古崇德象賢是則

建侯亦爲崇德也。武成曰：惇信明義，崇德報功。是則行師亦爲崇德也。彤弓曰：鐘鼓既設，一朝饗之。禮曰：君子聽鼓鼙之聲，則思將帥之臣。是則建侯行師，亦關作樂也。頌曰：建國元子，俾侯於魯。旣而曰：龍旂承祀，六轡耳耳。雅曰：王命召虎，式辟四方。旣而曰：釐爾主鬯，秬鬯一卣。是則建侯行師，亦關享祀也。

隨

隨。元亨利貞。无咎。○初九。官有渝。貞吉。出門。又有功。○六二。係小子。失丈夫。○六三。係丈夫。失小子。隨有求。得。利。居貞。○九四。隨有獲。貞凶。有孚。在道。以明。何咎。○九五。孚于嘉吉。○上六。拘係之。乃從。維之。王用享于西山。

象曰：澤中有雷隨。君子以嚮晦入宴息。

儀曰：嚮晦入宴息者，取諸隨時爲義也。嚮明出治，嚮晦卽入宴息。故曰隨也。隨六爻兼有明晦之二象，而其義歸于宴息。靜爲動君耳。曰官有渝，又曰出門交有功。官者，官骸也。耳目手足，明動晦息，官渝而吉者，此以出門爲嚮明之時。此時交物，可冀有功，而晦則不然。係小子，失丈夫，係丈夫，失小子者，此言係卽非隨。此亦在于向明之時，有失有係，而晦又不然。隨而有獲者，求人而遂，有孚在道者，途遇而合。此亦以嚮明故无咎，而晦又不然。晦入宴息，黝黝漆漆，居玄領寂，循中守宅，無得無失，何求何獲。天全道洽，嘉美自適，故曰孚于嘉吉也。拘係之乃從，維之者，此言宴息之象，敬闕凝結，有若

拘持而不知其神潛通乎玄合漠靜定之極。交于神明。故曰王用享于西山也。由此觀之。明不如晦。動不如息。明矣。彖故以乾之全德予之曰。元亨利貞。蓋言維玄維默。道之根宗。貞元相環。非有區際。此卽乾體以無容有者也。然美備矣。而又董其辭曰。无咎。以其境深理尊。譽所不處。惟不見有咎耳。元亨利貞。適可无咎。此四言者。非譽辭也。

蠱

蠱。元亨。利涉大川。先甲三日。後甲三日。○初六。幹父之蠱。有子。考无咎。厲終吉。○九二。幹母之蠱。不可貞。○九三。幹父之蠱。小有悔。无大咎。○六四。裕父之蠱。往見吝。○六五。幹父之蠱。用譽。○上九。不事王侯。高尚其事。

象曰。山下有風。蠱。君子以振民育德。

儀曰。振民育德者。具於爻之幹蠱高尙。苟以幹蠱爲新世。而曰振民。高尙爲潔身。而曰育德。此非易之義也。易之爲道。善世而不伐。德博而化。不伐者。以其不自名。化者。以其無迹。今夫前人已壞。革而新之。振民之至也。然必揭揭焉使前人見過。君子又以爲傷德。今幹父之蠱。卽歸功于父。曰是其父有子也。卽爲父釋過。曰其考何咎也。使前人化厲爲吉者。育德之至也。以此推之。亦有幹母之蠱。不以正而以權。如曲逆之于呂后。梁公之于則天。以不可貞爲其貞者也。亦有幹父之蠱。雖小有悔而无大咎。如元祐之改新法。曰此安石惠卿所爲。非先帝意。雖不無改父之嫌。而不失繼志之義也。亦

有裕父之蠱。如云三年無改父之道。非不當改。或可不急。則寬處之以待三年。有靳惜之意。不遽死親者也。亦有幹父之蠱。用譽如禹以蓋愆。而有天下。卒配鯀于天。終夏之世。皆頌鯀也。外振其民。內育其德。君子處蠱之世。幹其蠱之可得而幹者。其道如此。苟其蠱極不可得爲。則龍潛于淵。憂則達之矣。故曰不事王侯。高尚其事。開伯夷之風者。頑夫廉。懦夫有立志。是亦振民。莫我知也。夫上不怨天下。下不尤人。是亦育德。振民所以作始。育德所以致通。二者之學。無論飛潛。可以濟險者也。故彖曰元亨。又曰利涉大川。其曰先甲三日者。辛也。後甲三日者。丁也。更新所以興民。丁寧所以勤德。又辛于行爲金。金義制銳決。所以振也。丁于行爲火。火禮盛長養。所以育也。

臨

臨。元亨利貞。至于八月有凶。○初九。咸臨。貞吉。○九二。咸臨。吉无不利。○六三。甘臨。无攸利。既憂之。无咎。○六四。至臨。无咎。○六五。知臨。大君之宜。吉。○上六。敦臨。吉无咎。

象曰。澤上有地。臨。君子以教思无窮。容保民无疆。

儀曰。教思无窮。容保民无疆者。蓋言臨也。禮大學之禮。雖詔于天子。無北面。所以尊師。書帝德罔愆。臨下以簡。凡教與保民之事。歸之者。皆爲臨也。仲尼以臨六象爲教思。容保者。何所取之。取教于其貞。取保于其悔也。貞三爻在下。故以師道予之。悔三爻在上。故以君道予之也。凡教所由廢。以其扞格。故宜有以感之。鳴叩相發之曰感也。其始感之以正。以端其向。故曰咸臨。貞吉。其既感之以利。使

知好之故曰咸臨。吉无不利。其終不言感。而神理融流。不必曰有利。不必曰无憂。惟見甘也。亦不必曰有得。无咎而已。此教之成也。故曰甘臨。无攸利。既憂之。无咎。以此三者徵其教思。以其有始有卒。故曰教思無窮也。凡保民之道。貴與民習。以身親之。又則周知之。又則慎固之。習親之者。至乎其地。巡狩陟方。問民疾苦。先之勞之。既所身經。復何尤悔。故曰至臨。无咎。周知之者。不任己任。人。不使力。使智飛耳長目。洞幽徹遐。以其握簡居要。爲明治體。故曰知臨。大君之宜。吉。篤厚慎固之者。盛德至善。久道化成。金石之貞。不可移拔。譬土安重。使人重遷。故曰敦臨。吉。以此三者。知其容保。以其慎終如始。故曰容保民无疆也。進而求之。彖曰。元亨利貞。教養之成。備此四德。又亨利日出。貞元相循。无窮无疆之義也。八月有凶者。敷教御衆。皆必以寬。八月于卦爲兌。金盛執殺。月令以其時申嚴百刑。聖人固不欲使夏楚窮威。剋期爲治也。又君師之任。皆貴扶陽。八月陰始過。涉懼其以此敗教。害仁。故曰凶。

觀

觀。盟而不薦。有孚顒若。○初六。童觀。小人无咎。君子吝。○六二。闕觀。利女貞。○六三。觀我生進退。○六四。觀國之光。利用賓于王。○九五。觀我生。君子无咎。○上九。觀其生。君子无咎。

象曰。風行地上。觀。先王以省方觀民設教。

儀曰。省方觀民設教者。何。天子適於諸侯曰巡狩。無非事者。觀民者。審其風俗。設教者。施其政令。童

觀。小人无咎。君子吝者。此言風之樸茂。可以砥澆。氓之蚩蚩。有若童穉。雖非君子之儀。亦小人所以寡過者也。闕觀。利女貞者。此言俗之貞廉。可以坊淫。惴惴小心。守若處女。雖非丈夫之概。亦吉士所以無誘者也。觀乎其瀉而澆。可見觀乎其貞則淫可知。觀我生進退者。先王觀此民俗。而因以進退崇抑其間。教之所由設也。于是升其民之秀者。使觀國光。而賓興之典行焉。周禮以鄉三物。教萬民而賓興之。是爲觀國之光。利用賓于王也。觀我生君子者。此言教行而多君子。其自上興之。猶夫自我生之者也。周禮大比。考其德行道藝而興賢者能者是也。觀其生君子无咎者。此言民習教而皆知貴尚其君子。其民自興舉之。猶其自生者也。周禮使興賢者出使長之。使與能者入使治之。皆爲民自興舉其賢能者是也。凡若此者。蓋由天子一省方而教行民化。不煩久道。譬諸祭者。方當始暨未及陳薦。而顯若之誠。已成孚契。以此觀之。天子亦烏可以深居高拱者乎。

兒易內儀以卷之三

噬嗑

噬嗑亨利用獄。○初九。履校滅趾。无咎。○六二。噬膚滅鼻。无咎。○六三。噬臍肉。遇毒。小吝。无咎。○九四。噬乾肺。得金矢。利艱貞吉。○六五。噬乾肉。得黃金。貞厲无咎。○上九。何校滅耳。凶。

象曰：雷電噬嗑。先王以明罰勅法。

儀曰：口噬齒合。則噬物致決。故用之以明罰勅法。凡易之言刑者五。賁曰：無敢折獄。豐曰：折獄致刑。旅曰：明慎用刑而不留獄。中孚曰：議獄緩死。無敢折獄者。言刑措也。折獄致刑者。言斷決也。明慎不留者。言無留獄也。議獄緩死者。言矜恤也。明罰勅法者。言五罰五刑。著爲律令也。四卦皆曰：君子噬嗑。獨稱先生者。此以斷獄歸才。立法循典。原本古初。非後王之智可得爲也。凡閹實則有五刑。疑赦則有五罰。六爻之著。易之三章也。履校滅趾者。荆之屬也。噬膚滅鼻者。剕之屬也。噬臍肉。噬乾肺。噬乾肉者。墨宮之屬也。何校滅耳。大辟之屬也。是之爲五刑。得金矢。得黃金者。周禮以兩造禁民訟。入束矢于朝。然後聽之。以兩劑禁民獄。入鈞金三日。乃致于朝。然後聽之。舜典：金作贖刑。呂刑：墨辟疑赦。其罰百鍰。剕辟疑赦。其罰惟倍。荆辟疑赦。其罰倍差。宮辟疑赦。其罰六百鍰。大辟疑赦。其罰千鍰。是之爲五罰。五罰之曰明罰也。五刑之曰勅法也。贖罰有五。易獨二者。穆王之寬。不及周公之正也。

五刑之中。荆剗差輕。大辟爲極。輕可不原。極不聽贖。乾肺乾肉。以象求之。殆是宮刑。宮至絕嗣。小輕于辟。大甚於墨。荆剗生死之疑。獨宜贖耳。噬肺噬肉。矢金救戕。遇難能免。故曰利艱貞吉。曰貞吉无咎。滅趾滅鼻戕矣。猶曰无咎。臘肉遇毒。以象求之。殆爲墨辟。以肉麗面。爲攝全體。故取諸臘。臘者全體骨爲之也。以點涅之。故曰遇毒。小吝而猶曰无咎。此四者。聖人幸其不死。冀其補過。至于大辟滅耳。則无望矣。故曰凶也。治獄之道。勿辟勿宥。咸中有慶。罰以求通。法以明利。亨利用獄。斯之謂與。

賁

賁亨。小利有攸往。○初九。賁其趾。舍車而徒。○六二。賁其須。○九三。賁如皤如。永貞吉。○六四。賁如皤如。白馬翰如。匪寇婚媾。○六五。賁于邱園。束帛戔戔。吝終吉。○上九。白賁无咎。
象曰。山下有火。賁。君子以明庶政。无敢折獄。

儀曰。明庶政。无敢折獄者。蓋言政明則刑自措。雖有法吏。无敢施其折獄之能。使天下不畏法吏。而法吏畏名義鬼神。斯真文明之象。故歸之賁也。仲尼既明卦德。又審爻占。初之賁其趾。舍車而徒者。猶詩之曰。予曰有奔奏也。行人之官。駢駢及天子采風問俗。周知天下。必取諸此也。二之賁其須者。猶詩之曰。猗嗟變兮。清揚婉兮。鬢眉飾外。而可觀禮儀之事。吉凶軍賓嘉之燦者也。三之賁如皤如。永貞吉者。猶詩之曰。芄芄黍苗。陰雨膏之。膏澤下民。沾暨永世。地官遺人。掌邦之委積。以恤民艱厄。凶荒惠政之大者也。四之賁如皤如者。皤。白色也。兵於色爲白。白馬翰如者。猶詩之曰。四牡騤騤。

匪寇婚媾者。猶詩之曰我徂維求定。夏官司馬量馬三物。建軍五兵。是其政也。五之貢于邱園。束帛
戔戔者。猶詩之曰吹笙鼓簧。承筐是將。戔戔者。虞翻曰委積。或曰顯見也。玄纁禮賢。太宰之職。八統
之一曰禮賓者。是也。庶政之明。貢若艸木。內治本計。非爲飾也。故上曰白賁。无咎。猶詩之曰素以爲
絢兮也。無政不舉。而獨無折獄刑名之事。由其時天子尙德緩刑。而其下不敢以擊斷爲功。并無明
平之可舉耳。此知刑獄者。文治之所擯也。故彖曰賁亨。小利有攸往。政明故亨。獄清故利攸往。君子
道通。而小人亦有所措其手足。以爲文。則莫文于此矣。

剝

剝。不利有攸往。○初六。剝牀以足。蔑貞。○六二。剝牀以辨。凶。○六三。剝之。无咎。○六四。剝牀以膚。凶。○六
五。貫魚以宮人寵。无不利。○上九。碩果不食。君子得輿。小人剝膚。
象曰。山附于地。剝。上以厚下安宅。

儀曰。上以厚下安宅者。下之不厚。宅何能安。夫物之剝者多矣。而致專于牀者。蓋君子觀乎在牀。而
知陰之剝陽也。陰之剝陽。由陽昵陰。故循漸稱之。初剝牀足。剝于是乎始。既剝牀辨。剝于是乎盛。既
剝牀至盡而不知咎。剝于是乎不可察。終而剝人及膚。剝于是乎不可救。其極于膚。由于足之无衛。
足在下者也。厚下者使下不受剝。下不受剝。宅卽以安。此在持剝之道。以義制情。以義制情。雖使宮
人之寵。貫魚日進。而牀不受剝。何不利之。有人有寵而宮无尤。是亦爲下厚而宅安也。碩果不食。碩

言乎其厚。果以碩不食。下以厚不剝。君子得輿。是衆載君子。而其下厚矣。不若小人剝廬。薄下而宅不安也。彖曰。剝。不利有攸往。苟宅之安。他往何爲。苟宅之不安。他往何利乎。是故貴其厚下也。下者上之對。他象不稱上。此獨對上者。引以正下耳。上君下民。而寇賊不足稱下也。上主下臣。而小人不足稱下也。綏民禮臣。奠宅之本。聖人曰。其無以盜賊小人亂吾民臣。而因以敗吾宅乎。則不剝者乎。

復

復。亨。出入無疾。朋來无咎。反復其道。七日來復。利有攸往。○初九。不遠復。无祇悔。元吉。○六二。休復。吉。○六三。頻復。厲无咎。○六四。中行獨復。○六五。敦復。无悔。○上六。迷復。凶。有災眚。用行師。終有大敗。以其國君凶。至于十年不克征。

象曰。雷在地中復。先王以至日閉關。商旅不行。后不省方。

儀曰。至日閉關。商旅不行。后不省方。仲尼之著此者。雖以養陽晏陰順時之義爲言。其實以闡象也。蓋周公曰。不遠復。无祇悔。元吉。此以去之不久而卽來歸。慮其復萌去志。故宜遏閑靜居。庶乎无悔而得吉也。休復吉者。詩曰。役車其休。休猶止也。是爲閑不行之象矣。頻復厲者。頻復則必頻出。不閉不止。是故可危也。中行獨復者。玄曰。信無不在乎中。黃鐘中氣。與時偕行。蓋言日至也。獨以其日靜宴葆存。其他日則不必然。故曰獨復也。敦復无悔者。聖人以一日之凝翳。厚一歲之發生。靜故无咎也。迷復。凶。有災眚。用行師。終有大敗。以其國君凶。至于十年不克征者。此言不明來復之義。不得靜

膏而得禍者也。有災眚則內寇外侮可虞。關何可不閉。行師大敗。荆榛載塗。商旅何可行。君凶十年。下叛謀上。后何可省方。猶之象曰出入无疾。疾猶速也。方將閉關。出入何宜速乎。曰朋來无咎。商往不可也。朋來庶幾無害乎。曰反復其道。七日來復。利有攸往。王者之道。一張一弛。是爲反復。七日利往。未及七日。其姑徐徐不省方而可乎。

无妄

无妄。元亨利貞。其匪正有眚。不利有攸往。○初九。无妄。往吉。○六二。不耕穫。不菑畲。則利有攸往。○六三。无妄之災。或繫之牛。行人之得。邑人之災。○九四。可貞。无咎。○九五。无妄之疾。勿藥有喜。○上九。无妄。行有眚。无攸利。

象曰。天下雷行。物與无妄。先王以茂對時育萬物。

儀曰。茂對時育萬物者。何。王者敬天謹時。大配副之而已。故曰茂對。對者以時還時。春無行夏令。秋不亂冬儀。洪範曰。歲月日時無易。百穀用成。初九无妄。往吉者是也。蓋言時无妄行也。先王明時。教民稼穡。當春而耕。服牛冒物。不耕穫。不菑畲。則棄時失業。或繫之牛。行人之得。則棄資失力。利有攸往。言爲農不利。去而爲商。邑人之災。言一農失耕。百民失食。以此觀之。不對時。烏乎可乎。聖人之道。發育萬物爲功。育者。正物之德。而固其命。貴乎謹藏慎閉。無發房宜泄。月令曰。毋變天之道。毋絕地之理。毋亂人之紀。九四可貞。无咎者是也。蓋言物宜保固也。先王仁愛。惟謹民疾病。節宣以時。則災

疾不作。雖有疾患。非由氣候乖沴而生。故曰无妄之疾。此則不藥自愈。無傷于育。行有咎者。卽蘇氣不調正。雖有圭砭。不能爲功。故曰无攸利。天地不正之氣。被人爲疾。數物曰咎。疾咎之作。是爲亂徵。以此觀之。不有物烏乎可乎。夫時行物生。天之道也。故彖歸以乾之全德曰。元亨利貞。匪正則不對。有咎則不育。故曰不利有攸往也。

大畜

大畜利貞。不家食吉。利涉大川。○初九。有厲。利己。○九二。輿說輶。○九三。良馬逐利艱貞。曰閑輿衛。利有攸往。○六四。童牛之牯。元吉。○六五。豮豕之牙。吉。○上九。何天之衢。亨。

象曰。天在山上。大畜。君子以多識前言往行。以畜其德。

儀曰。多識前言往行。以畜其德者。蓋以初之曰有厲。利己者。此言當初之時。弱植淺渺。狃于世儒所持流俗之行。以此修德。坐取凶危。不如其已。蓋曰非求之前言往行不可也。二曰輿說輶者。此言前往繁重。輿不勝載而脫。蓋言多識也。三曰良馬逐利艱貞。曰閑輿衛。利有攸往者。此言以今追古。猶馬逐塗。進無畏難。退而審正。馬以逐之。輿以載之。識以取之。畜以聚之。聞見之學。歸于成德。于是則可以行也。四曰童牛之牯。元吉。五曰豮豕之牙。吉者。此言畜德也。觸噬不可以爲德。角牙不可以謀畜。牯牛豮豕。凶戢而慶彰。是所爲畜德也。又以牛童則昧。豕汚而饕。以牯豮戒牛豕。猶以前往戒夫蒙識汚行者也。上曰何天之衢。亨者。此言畜極而通也。何猶曰負。蒙莊云。背負青天而莫之天遏。多

識之胸。廣達滔滔。譬諸天衢。恣騁而無礙也。其在象曰利貞者。利以前言往行正其德也。不家食者。博聞廣見。不爲拘墟。上下千古以爲之資糧。豈不出戶庭數米量腹而食者乎。利涉大川者。言犯難也。中無所畜。涉險必濡。前言往行者。大川之導也。多識畜德者。揭厲之謀也。

頤

頤。貞吉。觀頤。自求口實。○初九。舍爾靈龜。觀我朵頤。凶。○六二。顛頤。拂經于邱頤。征凶。○六三。拂頤。貞凶。十年勿用。无攸利。○六四。顛頤。吉。虎視眈眈。其欲逐逐。无咎。○六五。拂經。居貞吉。不可涉大川。○上九。由頤。厲吉。利涉大川。

象曰。山下有雷。頤。君子以慎言語。節飲食。

儀曰。慎言語。節飲食者。何。蓋初曰舍爾靈龜。觀我朵頤。凶。此以靈龜不食而亦不言者也。龜之不食異物。其不言同物。然以其告人吉凶而固不言。似乎其能言而特慎之耳。聖人則之而初舍之。則迷慎節之道。朵頤者。哆口之象也。居下如此。則必獲禍。故凶也。二曰顛頤。拂經于邱頤。征凶者。顛非正辭。惟頤宜之耳。順頤之常。言語必多。飲食必縱。道以顛拂爲貴。教人慎節也。然尚以二在下无位。寡言畜奉。非其所難。雖慎節之。猶不言吉。況乃縱逞窮上有如崇邱。卑位而好高談。約居而喜奢享。不慎不節。往何救乎。三曰拂頤。貞凶。十年勿用者。以其能拂乎頤。則慎言節食。可以无咎。故曰貞。貞正也。固也。正誠可尊。固亦可疾。三之所處。乘權嚮用。括囊井泥。則亦已過。迷邦亂倫。亦猶凶德也。以其

見用而若不用者。故曰十年勿用。无攸利。此明慎節之義。非爲不言不食也。四曰顛頤。吉。四爲貴臣。居高履盛。頤尤易恣。固宜顛耳。顛則不至害成敗度。故吉也。曰虎視眈眈。其欲逐逐者。此言慎節也。虎威貪物。耽逐其性也。然耽耽以目。逐逐于心。而其頤卒不動。是明抑制克己爲功耳。五曰拂經。居貞吉。不可涉大川者。五居君位。恭默思道。不貪爲寶也。故亦貴乎遏抑矯常。守正而吉。然而不可以處險。故曰不利涉大川。何言乎涉大川也。其在上九之時乎。勢極難起。急而用頤。由者。猶曰聽之。顛之反也。至此。教令漸繁。取予微溢。揚號烹飪。疑非慎節。故曰厲厲危也。懼也。危固難居。懼亦有救。以懼持之。雖多言必有其誠。雖多取必有其制。猶之乎慎節耳。故吉而利涉也。由此而觀。慎節之義。猶曰時然後言。時然後取。三以不言不食而冒凶。上以言食而出險。頤可顛而不可由。而亦有顛之而非由之。而以濟者。要歸于正耳。觀乎頤而知言語飲食之歸于其口者。非虛嚙口也。言必可行。食期有濟。有其口之實存焉。慎之節之求則得之。彖曰頤貞吉。觀頤。自求口實。此之謂也。

大過

大過。棟桡。利有攸往。亨。○初六。藉用白茅。无咎。○九二。枯楊生稊。老夫得其女妻。无不利。○九三。棟桡凶。○九四。棟隆吉。有他吝。○九五。枯楊生華。老婦得其士夫。无咎无譽。○上六。過涉滅頂。凶。无咎。象曰。澤滅木。大過。君子以獨立不懼。遯世无悶。

儀曰。大過猶言極亂。世亂則仕者見節。隱者藏名。獨立不懼者。與其茅榮而靡。不如楊枯而立。與其

棟懼而橈。不如棟立而隆。遜世无悶者。與其悔枯。不如甘滅。與其生華見醜。不如滅頂免咎也。故曰藉者。猶言載也。取載于茅。雖潔白可觀。自幸无咎。而不可與立也。楊枯根立。譬若老夫健。凌少女陽不快。陰有利无懼也。棟處梁上。其體過也。橈則不立。心以爲凶。懼之甚也。棟隆不橈。道勝吉也。雖衆木不支。其他有吝。而一棟亭然。是明獨立也。枯楊生華。當否榮祿。譬若老婦逐于狡童。以遜爲悶。不可以居。苟容无禍。其名喪也。涉至滅頂。猶澤滅木。遜之深也。雖枯沒爲凶。而其心无悶。亦无咎也。是故文王觀于大過。而知大過之世。棟橈之世也。君子主其无懼。往必有爲。主其无悶。往必不返。君子之道。安往不得通者。故曰利有攸往。亨也。

坎

習坎。有孚。維心亨。行有尙。○初六。習坎。入于坎窞。凶。○九二。坎有險。求小得。○六三。來之坎坎。險且枕。入于坎窞。勿用。○六四。樽酒簋二。用缶。納約自牖。終无咎。○九五。坎不盈。祗既平。无咎。○上六。係用徽纆。寘于叢棘。三歲不得。凶。

象曰。水流至。習坎。君子以常德行。習教事。

儀曰。險貴其習之也。習之則視險如夷。故曰習坎。坎之曰險。非必憂患。凜危攻難皆險也。故君子以之常德行。習教事。凡爻之爲德行之言者。三。初曰習坎。入于坎窞。凶者。窮姿極際。猶曰深造之也。當始致功。徒見艱阻。而無有得。故凶也。二曰坎有險。求小得者。猶曰既竭吾才。如有立卓爾也。學力漸

進時見爲艱。亦時有利。得于心曰德。詣未極則見小也。五曰來之坎坎者。猶曰取之左右逢其源。險且枕者。猶曰居之安也。眞積致深。道自來會。不見坎險。惟見居安也。入于坎窞。勿用者。蓋言初之攻苦之力。可以不事也。此德行之序也。積其功以致成。故曰常也。爲教事之言。三四曰樽酒簋二。用缶。納約自牖。无咎者。猶曰時雨化之。爲中人而上言之也。飲食游息。無多訊言。微辭罕臂。相說以解。是也。五曰坎不盈。祇既平。无咎者。猶曰引而不發。中道而立。爲中人言之也。記曰。待其從容。然後盡其聲。又曰。不陵節而施。是也。上曰係用徽纆。寘于叢棘。三歲不得。凶者。猶曰以杖叩其脛。爲中人而下言之也。記曰。夏楚二物。以收其威。又曰。不變。移之郊。又不變。移之遂。又不變。屏之遠方。終身不齒。是也。此教事之等也。習其人而與之。故曰習也。二者皆至誠之道。所以求通。成己成物。往必有功。象曰。有孚維心。亨行有尚。謂此也。

離

離。利貞。亨。畜牝牛。吉。○初九。履錯然。敬之无咎。○六二。黃離元吉。○九三。日昃之離。不鼓缶而歌。則大耋之嗟。○九四。突如其來如。焚如。死如。棄如。○六五。涕沱若。戚嗟若。○上九。王用出征。有嘉折首。獲匪其醜。无咎。

象曰。明兩作離。大人以繼明照于四方。

儀曰。繼明照于四方者。何。明照者。日也。禮統曰。日實也。人君之象。繼日之照。自新新民。大人之學也。

觀于初九履錯然敬之无咎。此日初出時也。詩曰：如日之升。若有乘踐。猶曰：日乘車以駕六龍。故曰履。以其昏曉初分。月星相錯。故曰錯然也。敬之者。猶書曰：寅賓出日。傳云：寅敬也。六二黃離元吉。此日中天時也。黃爲中色。傳曰：煌煌以黃日。午正雖還其本位。故曰元吉也。九三：日昃之離。不鼓缶而歌。則大耋之嗟。此日欲入時也。日入而其光愈赫。故曰日昃之離。羞明者歌。憂晦者嗟。歌嗟之情。晦明之象也。明照出入。具此三者。大人繼之以爲明。其明德亦有其朝。晝昏暮焉。九四曰：突如其來如。者。此言德之始明。忽然如滌。亦若日初出時也。曰焚如者。此言德之既明。熾然攸灼。亦若日中天時也。曰死如棄如者。此言德之明極復晦。蒼然若沒。亦若日欲入時也。曷能使不明者明。明者無餘明。明而復晦者。晦而復明。君子憂之。憂之則思治之矣。五曰：出涕沱若。戚嗟若。吉。此言憂思哀懼。誠求明而明出也。繼日之明。握明以照。可以克己。可以正邦。上九曰：王用出征。欲使四方之不明者皆明也。有嘉折首者。猶曰：嘉與維新也。折首猶言崩角。亦猶言革面。獲匪其醜者。猶曰：幹不庭方也。醜猶言衆。亦猶言類。嘉其不梗。誅其非類。大兵發而萬物皆服。大明發而萬物皆照。天下莫不尊日而貴大人也。是故彖有之曰：利貞亨。畜牝牛吉。貞慮其不繼。通慮其不及四方也。天下皆歸文于虎豹。不知歸明于牝牛。虎豹猛而文。牝牛順而力。震用伐鬼方。虎豹之威也。離繼明照于四方。牝牛之德也。

兒易內儀以卷之四

咸

咸亨利貞。取女吉。○初六。咸其拇。○六二。咸其腓。凶。居吉。○九三。咸其股。執其隨。往吝。○九四。貞吉。悔亡。憧憧往來。朋從爾思。○九五。咸其脢。无悔。○上六。咸其輔頰舌。

象曰。山上有澤。咸。君子以虛受人。

儀曰。君子以虛受人。曷言乎虛也。其中空空。若無有物。無物則不逐物而動。其身甚靜。聽物來歸。而不辭。故曰受也。若夫初之咸拇。二之咸腓。三之咸股。四之憧憧往來。上之咸輔頰舌。皆爲躁動自用。奸居物先。物不能入。有拒無受者也。惟居則吉。惟貞則吉。悔亡。惟脢則无悔。居者守內。不移往來之反。貞者循常。無惑憧憧之救。脢者背肉至靜。拇腓股頰。所不得牽。皆爲靜虛。無係因物而應。淵乎有容。以受爲德者也。然而受之爲言。猶鑑空懸。物自形獻。既非我往隨物。亦非人來從我。三惟咸股。則有執隨之吝。不靜其幾。必爲物役矣。四惟憧憧。則有朋從之擾。不虛其體。物思附之矣。夫隨非受也。朋之從之。非其受也。所以象曰。亨利貞。蓋言通物之情。貴其靜正也。曰取女吉者。婦執隨有朋。女則不然。中無係而體孤也。無隨可執。朋亦不得從。君子求之。斯受之耳。天下莫虛于女也。

恆

恆亨无咎利貞利有攸往。○初六浚恆貞凶无攸利。○九二悔亡。○九三不恆其德或承之羞貞吝。○九四田无禽。○六五恆其德貞婦人吉夫子凶。○上六振恆凶。

彖曰雷風恆君子以立不易方。

儀曰立不易方者何也蓋言立乎其處而不遷也立乎其處而不遷者是謂常居是地也既取諸常居是地則不常居是地而遷焉者是謂不恆其德而可羞而不獨此也既以不遷之謂常又謂是不遷者不足以盡常更進而深求之此即已易方而不恆也而又謂是不遷者久疑有變今更振作之以必使之無變此亦已易方而不恆也故初之浚恆上之振恆與三之不恆同德而皆凶也必也九二之悔亡乎何謂悔亡凡進而不擇所安則悔退而忽失所持則悔其中有悔必將變矣其情多變悔愈有矣今日悔亡明乎其居安而不易也必也四之田无禽乎何謂田无禽凡有獲必失得失遷流以生徵逐今田无禽則無所得也曰无禽不曰失禽也無得無失是其常不易有而无也必也五之恆其德貞婦人吉乎何謂婦人吉也婦人從一不可易夫易夫則不歸夫可以易婦也故以夫子之道居德則不恆而凶以婦人之道居德則有恆而吉也夫恆之爲德非拘常也立不易方之爲義非株守也觀天下之會通而无咎者其究歸于貞耳由是則可以周流六虛而無礙惟不易故易也彖故曰亨无咎利貞利有攸往也。

遯亨。小利貞。○初六。遯尾厲。勿用有攸往。○六二。執之用黃牛之革。○九三。係遯。有疾厲。畜臣妾吉。○九四。好遯。君子吉。小人否。○九五。嘉遯。貞吉。○上九。肥遯。无不利。

象曰：天下有山。遯。君子以遠小人。不惡而嚴。

儀曰：遠小人。不惡而嚴者。何勢在小人。君子道消。去而遠之。非爲逃禍也。君子欲以遯亢其道。亦使小人知君子不苟富貴。小人不可以富貴君子。則勝氣在君子。此以爲惡則不惡。以爲不嚴則嚴也。初曰遯尾。遯至于尾。無餘遯也。此繇其思危而力猛。故曰厲。厲之爲義。其危與猛兼辭也。勿用有攸往。亦兼辭也。勿往。撓小人以明不惡。勿往就小人以示嚴也。二曰執之用黃牛之革。莫之勝說。執而不脫。志必欲遠之也。君子得時而升。則爲虎豹之變。不得時而駕。則爲黃牛之革。牛力敵虎豹。而不見可畏。黃中君衆色。而無所示威。不見畏。示威者。不惡也。貞力而執中者。嚴也。三曰係遯。有疾厲者。遠之已矣。牽拘不化。已甚生亂。道亦可危。故誠之以畜臣妾吉。畜之如臣妾者。不惡也。以臣妾畜之者。嚴也。四曰好遯者。好諛如字。猶言不惡也。終于君子吉。而小人否。不使小人得加于君子者。嚴也。五曰嘉遯者。嘉猶言好也。不惡也。終于正人吉。不貶正以趨凶者。嚴也。上九肥遯。有寬無迫。示之廣大者。不惡也。終于无不利。不使小人得以害道傷正者。嚴也。由此觀之。君子之決于遯者。惟慮小人不利用君子耳。甚矣小人爲難養也。近之不利。惡之不利。不嚴之亦不利。所貴乎遯者。貴其轉因爲亨。而不受小人之害。反若小人之有利于正者。故曰遯亨。小利貞也。

大壯

大壯利貞。○初九壯于趾，征凶，有孚。○九二貞吉。○九三小人用壯，君子用罔，貞厲，羝羊觸藩，羸其角。○九四貞吉，悔亡，藩決不羸，壯于大輿之輹。○六五喪羊于易，无悔。○上六羝羊觸藩，不能退，不能遂，无攸利，艱則吉。

象曰：雷在天上，大壯。君子以非禮弗履。

儀曰：非禮弗履，系于大壯。凡敢于冒非禮而行者，皆天下之強有力人也。夫禮，德之藩也。擊虞曰：羊淫而狠，淫則蔑禮，狠而敢爲，故凡爻之曰藩者，皆言禮也。曰羊者，皆言非禮而履者也。其曰羝羊觸藩，羸其角者，此心欲棄禮而勢不得行，徒自傷者也。曰羝羊觸藩，不能退，不能遂，无攸利者，此錯趾非禮而尚不敢顯然自恣，徘徊其間者也。曰藩決不羸，壯于大輿之輹者，此無忌憚小人，又乘可爲之勢，悍然叛棄禮法，決藩而出，如游大通者也。是故君子謹藩而畏觸也。觸之不已，必至于決，藩決四達，化而爲輿，是故君子惡夫羊也。非禮勿履，莫如喪羊。羊喪則藩存，爾愛其羊，我愛其禮也。易猶疆場也。喪羊于場，望藩而退，戒非于履，望禮而凜，由此言之，人不可不謹所履也。履之不謹，咎在其趾。壯趾征凶，小人用壯者也。貞吉艱吉，君子用罔者也。小人自用而孚窮，君子若無而悔亡，非禮之禮，烏可履乎？取諸審固而不回，故象曰利貞也。

晉康侯用錫馬蕃庶。晝日三接。○初六。晉如摧如。貞吉。罔孚。裕无咎。○六二。晉如愁如。貞吉。受茲介福。于其王母。○六三。衆允悔亡。○九四。晉如鼫鼠。貞厲。○六五。悔亡。失得勿恤。往吉无不利。○上九。晉其角。維用伐邑。厲吉无咎。貞吝。

象曰。明出地上。晉。君子以自昭明德。

儀曰。君子自昭明德者。何也。晉之爲言。升舉也。其象揚上。聖人引而內之。歸諸闡修。故曰自昭。猶曰。吾自明吾德耳。德明則晉。不明則退。於遇之升沈。無有也。觀于爻之初曰。晉如摧如。貞吉。罔孚。裕无咎。則知晉而得。摧不足患也。德昭而不失其正。雖摧亦吉也。雖不信于上。而德有餘明。則亦无咎也。觀于六二之晉。如愁如。貞吉。受茲介福。于其王母。則知不晉而愁。亦無益也。惟固其德。不失吉也。父外而母內也。母親而王母尊也。求章于闡。抗德于無加。則爲大福也。觀于六三之衆允。悔亡。則知人共知之爲貴。不如心无悔之可安也。觀于九四之晉。如鼫鼠。貞厲。則知不務明其德。而求晉。其身其情。有如鼫鼠。雖或分所應得。未失其正。而亦可危也。觀于五之悔亡。失得勿恤。往吉无不利。則知苟德明于己。悔亡于心。卽名位失得。可以勿論。无往不吉。而升沈皆利也。觀于上之晉。其角。維用伐邑。厲吉无咎。貞吝。則知雖位之崇。無廢內治。以其晉角位極故危。以其伐邑內治故吉。无咎。貞而猶吝者。以其勢重而道未易光。亦知晉不在位也。而又觀于彖之康侯用錫馬蕃庶。晝日三接。則知侯以安國之德晉也。禮曰。天子五年一巡狩。覲諸侯。有功德于民者。加地進律。詩曰。王遣申伯。路車乘馬。

又曰。申伯之德。柔惠且直。揉此萬方。聞于四國。又曰。既見君子。爲龍爲光。其德不爽。又曰。載見辟王。曰。求厥章。龍旂央央。絳革有鷩。休有烈光。皆爲諸侯以明德蒙錫。被禮遇于天子之詞也。

明夷

明夷。利艱貞。○初九。明夷于飛。垂其翼。君子于行。三日不食。有攸往。主人有言。○六二。明夷。夷于左股。用拯馬壯。吉。○九三。明夷于南狩。得其大首。不可疾貞。○六四。入于左腹。獲明夷之心。于出門庭。○六五。箕子之明夷。利貞。○上六。不明晦。初登于天。後入于地。

象曰。明入地中。明夷。君子以蒞衆用晦而明。

儀曰。詩云。有夷之行。又曰。降福孔夷。書曰。受有億兆夷人。夷猶言平也。明夷者。蓋言日升而就高爲明。降而就平爲晦。蒞衆用晦而明者。此言衆不可以明明之。聖人將動。必有愚色。察繳之明非明也。是故觀于垂翼倦飛。不食阻饑。則知晦矣。觀于攸往化行。有言聲振。則知明矣。觀于左股之夷。處下跼蹐。則知晦矣。觀于壯馬用拯。不脛而馳。則知明矣。觀于南狩明夷。失其離照。則知晦矣。觀于得其大首。化疾爲喜。則知明矣。觀于人于左腹。匿幽不揚。則知晦矣。觀于明夷獲心。意得而出。則知明矣。觀于箕子囚商爲奴。則知晦矣。觀于箕子入周而封。則知明矣。凡此五者。非幸其在晦而明也。蓋嘉其用晦而明也。何以言之也。今使飛不垂翼。則是不就下也。行必得食。則是不虛中也。衆何由戴而信之。而往必利。言必應乎。今使左股不夷。則棄物自用。壯馬何繇效拯而得吉乎。今使居尊馭遠。而

不少降威。何繇得羣策之升。而得其大首。不爲病乎。今使不入左腹而沈其感。何繇可得志門庭之外乎。今使箕子先不佯狂而爲奴。何繇得入周而陳其疇範乎。此爲用晦而明。蓋爲不明晦不可以明。凡蒞衆之所以不明而晦者。由其用明而晦。如日之初登于天而後入于地也。若使初入于地。後登于天。是爲用晦而明者矣。道莫利于阻深專固。以養晦而裕明。故曰利艱貞也。

家人

家人。利女貞。○初九。閑有家。悔亡。○六二。无攸遂。在中饋。貞吉。○九三。家人嗃嗃。悔厲吉。婦子嘻嘻。終吝。○六四。富家大吉。○九五。王假有家。勿恤吉。○上九。有孚威如。終吉。

象曰。風自火出。家人。君子以言有物而行有恆。

儀曰。言有物。行有恆者。守繩蹈常。必信必果。所以教家也。故曰閑有家。立木于門。以制出入。一言一行。必循乎此。如是則悔亡也。故曰无攸遂。在中饋。无攸遂者。謹言拘行也。在中饋。則言中饋。其行亦不離乎中饋。如是則正而吉也。故曰家人嗃嗃。悔厲吉。婦子嘻嘻。終吝。嗃嗃者。繩簡之過。嘻嘻者。踰蕩之漸。與婦子處而詭變爲通。終必吝也。故曰富家大吉。有物則其藏實。有恆則其澤長。是所爲富也。法言矩行滿其家。不謂之富家不可也。故曰王假有家。勿恤吉。言行動乎天地。儀正而聲聞。家成教于國。國取法于家也。故曰有孚威如。終吉。以法正言行。則可信。以軌物治家。則有威也。凡聖人之致嚴家人如此者。誠以家道之敗。繇于女德。女德不終。繇于柔昵。聖人矜言慎行。甯固毋通。蓋欲使

女之敬男也。女敬乎男。家無不正矣。故曰家人。利女貞。硤硤然有物有恆。貞之教貞也。教女貞者。豈可使之託于大人之德乎。

睽

睽。小事吉。○初九。悔亡。喪馬勿逐。自復。見惡人。无咎。○九二。遇主于巷。无咎。○六三。見輿曳。其牛掣。其人天且劓。无初有終。○九四。睽孤。遇元夫。交孚。厲无咎。○六五。悔亡。厥宗噬膚。往何咎。○上九。睽孤。見豕負塗。載鬼一車。先張之弧。說後之弧。匪寇婚媾。往遇雨則吉。

象曰。上火下澤。睽。君子以同而異。

儀曰。君子以同而異者。何。夫同異之道相環也。求同必取諸異。求異必得其同。仲尼之曰同而異。本乎周公之曰異而同。其實一也。故曰喪馬。異也。曰勿逐。自復。異而同也。惡人。異也。見之无咎。異而同也。不庭而巷。異也。終必遇主。異而同也。輿曳牛掣。天且劓。異也。无初有終。異而同也。睽孤。異也。遇元夫。交孚。異而同也。噬膚則傷。異也。往慶无咎。異而同也。見豕負塗。鬼車張弧。異也。後脫婚媾。遇雨往吉。異而同也。以異而同。猶曰以同而異也。君子之與物。貴其小異。以爲大同。苟求大同。宜爲小異。故曰睽。小事吉也。

蹇

蹇。利西南。不利東北。利見大人。貞吉。○初六。往蹇來譽。○六二。王臣蹇蹇。匪躬之故。○九三。往蹇來反。○

六四往蹇來連。○九五大蹇朋友。○上六往蹇東碩吉。利見大人。
象曰：山上有水，蹇。君子以反身修德。

儀曰：反身修德者，何詩曰：威儀反反。蓋言進止往來也。君子進而修業，反而修德，往以治人，來以治己。進反之義，猶云往來。仲尼之言修曰：反者，取諸六爻之言。往曰來也。初曰：往蹇來譽，往而得蹇，非身咎也。來而有譽，非人力也。此言反也。二曰：王臣蹇蹇，匪躬之故。蹇而又蹇，遇斯窮也，非其身之故，德自修也。此言反也。三曰：往蹇來反，往不得往，故見蹇也。來之又來，反必得也。此言反也。四曰：往蹇來連，往而責世，其道睽也。來而求己，其類同也。此言反也。五曰：大蹇朋來，進而多懼，禍之聚也。退而不孤，德之隣也。此言反也。上曰：往蹇來碩吉，利見大人，往之曰蹇，蹇由人也。來之曰大，大在身也。小人造蹇，大人造修也。此言反也。此明君子之于世，進有蹇也，反無蹇也。凡地勢自北而東，日趨進也。自南而西，日趨反也。東北艮所險阻難行，西南坤維靜翕中美。君子反求諸身，承天而親聖人，何蹇之有哉。象曰：利西南，不利東北，利見大人，是其義也。

解

解利西南，无所往，其來復吉。有攸往，夙吉。○初六，无咎。○九二，田獲三狐，得黃矢，貞吉。○六三，負且乘，致寇至，貞吝。○九四，解而拇，朋至斯孚。○六五，君子維有解吉，有孚于小人。○上六，公用射隼于高墉之上，獲之，无不利。

象曰雷雨作解君子以赦過宥罪。

儀曰君子以赦過宥罪者何。書曰宥過無大刑故無小過者誤繇無心所謂眚災此宜原有故者有意爲惡是爲姦宄所必刑誅曰過則無大者曰故則無小者宥不宥大刑不刑小也此知君子所赦宥者必其可原者也。有赦有宥必有其不赦不宥者也。君子之所爲赦宥者四初之无咎二之三狐四之解拇五之維解是也。何以言之。初以事勢未歸雖不能有爲無解于過然固不可以其咎咎之也。三狐朋陰而地卑無恃雖執獲之黃金鈞矢罰作贖刑亦不失其爲正而吉也。四拇錯趾過始見端尙在以衆正之力制之而轉敗爲功解之而孚也。君子罹羅解之其正卽小人之可得而感孚者解之亦未爲不吉也。凡此四者皆書之所稱過誤眚災君子之所赦宥者也。若夫負乘致寇盜位釀禍則無赦詞莽戎升墉變醜獻功則無宥法。君子赦過宥罪豈赦亂國之小人宥干紀之寇賊乎。然而三曰貞吝雖法之正而中有牽疑猶書云雖畏勿畏無僭亂辭上曰獲之无不利雖正厥辜而蒙恩者衆猶書曰殲厥渠魁脅從罔治則亦終歸于赦宥而已。象曰利西南者坤德廣生示之含弘也。无所往者不往而厲求之也。來復吉有攸往夙吉者欲其遷善急速如雷之不終日水之渙渙然也。雷水曰解取諸此也。

損

損有孚元吉无咎可貞利有攸往曷之用二簋可用享。○初九已事遄往无咎酌損之。○九二利貞征凶。

弗損益之。○六三。三人行則損一人。一人行則得其友。○六四。損其疾使過有喜。无咎。○六五。或益之。十朋之龜弗克違。元吉。○上九。弗損益之。无咎。貞吉。利有攸往。得臣无家。

象曰。山下有澤。損。君子者懲忿窒欲。

儀曰。懲忿窒欲者。忿欲皆以不化之心。爲已成之事。懲之窒之。使速遷化。歸于无過耳。故曰。已事遄往。无咎也。或不能驟除。以漸酌減之。故曰。酌損之也。懲窒之者。固持而不使得行。行則有害。蓋以忿欲弗日損。則必日益。故曰。利貞。征凶。弗損益之也。心一也。忿欲參立而三。苟使忿欲與心並立。則必損其心。惟一心自主。則得懲窒之助。故曰。三人行則損一人。一人行則得其友也。忿欲皆疾也。懲窒之則疾去而喜。故曰。損其疾。使過有喜。无咎也。忿由于躁。欲生于見。可欲。故曰。益之。十朋之龜弗克違者。有二義焉。一則以龜之靜教之。使之遵守弗違。以制忿也。一則以十朋之龜之可欲試之。貴能弗違其本心。以制欲也。故曰。元吉也。夫于忿欲爲損者。于心爲益。然則非損也。益也。可以補過。坐進于道。故曰。弗損益之。无咎。利有攸往也。心與忿欲。主臣之辨也。心有主。則忿欲皆受制于心。而爲之臣。不家于心。而與之處。故曰。得臣无家也。由此則知懲窒之與心孚。可以長善而救過。居正而利行也。故曰。有孚。元吉。无咎。可貞。利有攸往也。何以用之。用之享祀。入廟而敬。忿不期懲而自懲。享用薄物。明水告虔。欲不期窒而自窒。人無以忿享者。而又何欲于二簋。故曰。曷之用。二簋可用享也。

益

益。利有攸往。利涉大川。○初九。利用爲大作。元吉。无咎。○六二。或益之。十朋之龜。弗克違。永貞吉。王用享于帝。○六三。益之用凶事。无咎。有孚中行。告公用圭。○六四。中行。告公從。利用爲依遷國。○九五。有孚惠心。勿問元吉。有孚惠我德。○上九。莫益之。或擊之。立心勿恆。凶。

象曰。風雷益。君子以見善則遷。有過則改。

儀曰。見善則遷。有過則改者。蓋言聖修也。善日遷而愈有。過日改而至無。此非聖人不能。賢人爲之。亦必至于聖而後已。其奮迅決驟。動乎非常。足當大事。爻之曰。利用大作。元吉。无咎。似謂此也。其遷善以趨吉。改過以避凶。足當耆龜之德。爻之曰。或益之。十朋之龜。弗克違。永貞吉。亦似謂此也。窮理盡性。則至于命。齋戒沐浴。可事上帝。足當天人之際。地天之通。爻之曰。王用享于帝。亦似謂此也。徙變震厲。足當凶事。有善无過。足當中德。公者人臣之極。圭者無瑕之純。善極無加。過銷至盡。足當公圭之義。爻之曰。益之用凶事。无咎。有孚中行。告公用圭。亦似謂此也。德惟日新。改過不吝。足當成湯之建中。告過則喜。告善言則拜。足當由禹之從人。用德彰厥善。無起穢自臭。足當盤庚之遷國。爻之曰。中行。告公從。利用爲依遷國。亦似謂此也。君子之見善也。不期遷而遷。其有過也。不期改而改。中心誠然。非必以是爲吉而爲之。爲之不已。其究至于無善可遷。無過可改。足當大順之德。爻之曰。有孚惠心。勿問元吉。有孚惠我德。亦似謂此也。苟不其然而見善不遷。甯有長益。有過不改。必承擊伐。離宗變常。足當凶人之爲不善。爻之曰。莫益之。或擊之。立心勿恆。凶。亦似謂此也。夫惟見善必遷。則

日進而上行。有過必改。則出險而有濟。足當聖人之適變。君子之經綸。象之曰利有攸往。利涉大川。亦似謂此也。

兒易內儀以卷之五

夬

夬。揚于王庭。孚號有厲。告自邑。不利即戎。利有攸往。○初九。壯于前趾。往不勝爲咎。○九二。惕號。莫夜有戎。勿恤。○九三。壯于頄。有凶。君子夬夬。獨行。遇雨若濡。有愠。无咎。○九四。臀无膚。其行次且。牽羊悔亡。聞言不信。○九五。莧陸夬夬。中行无咎。○上六。无號。終有凶。

象曰。澤上有天。夬。君子以施祿及下。居德則忌。

儀曰。君子以施祿及下。居德則忌者。何。夫居德猶言自以爲功也。自以爲功。則必自用。自用必自聖。自聖必以其下爲不足與謀。不使見能。祿亦不及之耳。周公知之。攬爻而作曰。嗟乎。君人者豈有能自用爲功者乎。自用則必無功。故曰壯于前趾。往不勝爲咎。非不勇往。而無如不勝何矣。故曰惕號。莫夜有戎。勿恤。非無教令。惕且號之。而無如莽戎夜興。而下莫之憂何矣。故曰壯于頄。有凶。君子夬夬。獨行。遇雨若濡。有愠。无咎。雖震怒夬殺。以明獨攬。而無如其承濡召愠。無所歸咎何矣。故曰臀无膚。其行次且。牽羊悔亡。聞言不信。雖欲安坐聽之。不則前往拯之。不則牽引其類與共圖之。而無如臀傷而不可處。足循而不良行。喪如无耳。而牽之不得前何矣。故曰莧陸夬夬。中行无咎。雖欲中立自處無過。而無如羣邪之叢起何矣。故曰无號。終有凶。雖將伯助予。而無如庭虛無人。終亦必亡何。

矣。周公之爲此言者。蓋言居德不可也。仲尼知之曰。如此莫如恃下。恃下莫如施祿。觀于豕曰。揚于王庭。則知明揚側陋。詔祿舉賢。不曰獨行無號也。曰孚號。有號必孚。不曰聞言不信也。曰有厲。告自邑。急而告下。必有應者。不曰惕號。有戎勿恤也。曰不利。卽戎利有攸往。不藉武健而行。无不利。不曰壯趾爲咎。壯頗有凶。无厲次且也。施祿之義大矣哉。

姤

姤。女壯。勿用取女。○初六。繫于金柅。貞吉。有攸往。見凶。羸豕孚蹢躅。○九二。包有魚。无咎。不利賓。○九三。臀无膚。其行次且。厲无大咎。○九四。包无魚。起凶。○九五。以杞包瓜。含章。有隕自天。○上九。姤其角。吝。无咎。

象曰。天下有風。姤。君子以施命誥四方。

儀曰。施命誥四方者。何。昔者先王當艱難有事之會。修其文告。以布和釋疑于天下。稱之曰誥。誥所以施命及遠也。詩曰。訏謨定命。遠猶辰告。凡先王誥民而民從者。其道有四。夙孚一也。驟激二也。中懼三也。外和四也。夙孚者在姤初曰繫于金柅。上下之情。維繫繫結。有若金柅。貞固和吉。然後可以往而令民。故曰貞吉。有攸往。雖頑梗見凶。理無猜突。故曰羸豕孚蹢躅。蓋其戢也。甘誓作而有扈誅。大誥頒而武庚定。其固然也。驟激者在姤二曰包有魚。詩曰。魚躍于淵。包義激衆。民用鼓躍。此我之驅。非敵之利。故曰不利賓也。牧獸一誓。維予侯興。周王商亡。不利商也。中懼者在姤三曰臀无膚。其

行次且。國之大事。欲止不能。欲行可畏。其心危懼。作誥喻民。以幸无過。故曰厲无大咎也。盤庚河患。居則曰民其盡劉。遷則曰民之弗率。三誥之作也。由懼生也。外和者。在姤五曰以杞包瓜。杞剛以擬主尊。瓜柔以方民賤。杞之包瓜。猶上畜下。抑威輶光。使四方聞者。以爲德音仁聲。自天而降。故曰含章。有隕自天也。湯誥曰。罪當朕躬。弗敢自赦。成王誥曰。越予冲人。不叩自恤。皆爲引謙自向。歸敬于民也。此四者。施命誥四方之義備矣。若夫三之无魚有魚之反也。不能動衆。適足起凶。上之姤角一曲之守也。不能及遠。安能免吝。幽王傳烽四告而無應者。東周教令不能出其畿甸百里之外。當是之時。豈有命誥乎。命誥者。聖人之所以布陽遏陰也。故取諸姤。姤初陰日昌。爲女而壯。天下有事。民柔而悍。此不可以勢取。惟宜誠信訓諭之。彖曰女壯。勿用取女。標梅迨其謂之之義也。

萃

萃亨。王假有廟。利見大人。亨利貞。用大牲吉。利有攸往。○初六。有孚不終。乃亂乃萃。若號。一握爲笑。勿恤。往。无咎。○六二。引吉无咎。孚乃利用禴。○六三。萃如嗟如。无攸利。往无咎。小吝。○九四。大吉无咎。○九五。萃有位。无咎匪孚。元永貞。悔亡。○上六。齎咨涕洟。无咎。

象曰。澤上于地。萃。君子以除戎器。戒不虞。

儀曰。除戎器。戒不虞者。此易再言兵也。易之言兵者。必精微光大。歸于文德。初曰有孚不終。乃亂乃萃。若號。一握爲笑。勿恤。往。无咎者。此言安治之形。苟信恃之。必不保終。至于亂見求萃。號無及矣。必

也克詰先事。則勝氣在握。而號者以笑。往无憂咎也。二曰引吉无咎。孚乃利用禴者。此言兵凶而引之歸吉。卒無禍咎者。由于早戒。信能爲之。必受福也。三曰萃如嗟如。无攸利。往无咎。小吝者。備器曰萃。戒慎曰嗟。兵不求利。惟喜无害。當其深念卻顧。亦若有靳然也。四曰大吉无咎者。此言既除既戒。進必得志。退可无患。然而攻守之事。易所不言。故但陳其應。不著其謀也。五曰萃有位。无咎匪孚。元永貞。悔亡者。易蓋曰。兵者仁義之衛也。謀不亂于應敵。則可以萃聚百爾。內治補過。誠非信兵爲可恃。而欲以教戰者。止殺。使元善之德。貞于永久。如是則知兵亦善氣而非毒。故无悔也。上曰齋咨涕洟。无咎者。易蓋曰。佳兵不祥也。先之以憂思。繼之以哀懼。明非耀威黷武而爲之。故不可以歸咎也。夫聖人之治兵如此。是其事卽禮樂之事。雖日詰五兵。月咨九伐。而猶之乎俎豆冠裳之會。饗燕往來之文。故曰王假有廟。利見大人。亨利貞。用大牲吉。利有攸往。文王曰。聖人以除戎器。戒不虞。而有此也。聖人之除戎器。戒不虞。其卽在此也。

升

升。元亨。用見大人。勿恤。南征吉。○初六。允升。大吉。○九二。孚乃利用禴。无咎。○九三。升虛邑。○六四。王用享于岐山。吉无咎。○六五。貞吉。升階。○上六。冥升。利于不息之貞。

象曰。地中生木。升。君子以順德。積小以高大。

儀曰。君子以順德。積小以高大者。以其積漸而然。不爲逆施。故曰順也。初曰允升。大吉者。凡升必自

下上信能致升。則必由亨致吉。由小致大。德之至順。是故其升之序。可得而言也。二曰孚。乃利用禴。禴者家祭。是爲德升于家矣。三曰升。虛邑。邑虛無人。入焉無阻。是爲進之。德升于國矣。四曰王用亨于岐山。天子得祭天下山川。是又進之。德升于天下矣。五曰貞吉。升階。階者天三階也。天不可階。升而太乙乘蹕。若有階然。是又進之。德升于天矣。上曰冥升。利于不息之貞。升至于天。高矣大矣。無可復加。惟有不。息以其神行無跡。故曰冥升。升之極矣。彖曰元亨。用見大人。勿恤。南征吉。自其姑通諂極。前進不已。日趨休嘉。何憂之有乎。

困

困。亨貞。大人吉。无咎。有言不信。○初六。臀困于株木。入于幽谷。三歲不覿。○九二。困于酒食。朱紱方來。利用享祀。征凶。无咎。○六三。困于石。據于蒺藜。入于其宮。不見其妻。凶。○九四。來徐徐。困于金軍。吝。有終。○九五。劓刖。困于赤紱。乃徐有說。利用祭祀。○上六。困于葛藟。于臲卼。曰動悔。有悔。征吉。象曰。澤无水。困。君子以致命遂志。

儀曰。不曰澤下有水。曰澤无水。猶之不曰澤下有木。曰澤滅木也。兌金制木。爲滅之盡。故曰大過。澤上水下。不相交和。是澤枯無水。故曰困。困能憂小人。不能憂君子。君子于義不得死者。天下不能死。君子。君子以爲不得不死者。人以爲困。君子以爲無憾。故曰以致命遂志也。昔者文王亦致命也。拘幽之操曰。臣罪當誅。其意以爲志得不怨也。是得困之初六曰。臀困于株木。入于幽谷。三歲不覿。昔

者龍逢比干之徒亦皆致命也。龍逢比干以爲食人之祿。擔人之爵。非不知佞神禱祠。可以獲福。惡其非義。往諫而死。亦志遂。雖凶無過也。是得困之九二。曰困于酒食。米絀方來。利用亨祀。征凶无咎。昔者箕子亦致命也。箕子乘剛罹禍。爲奴拘囚。商其淪喪。國亡家覆。而其言曰。我不顧行遜。亦謂吾遂吾志也。是得困之六三。曰困于石。據于蒺藜。入于其宮。不見其妻。凶。昔者召忽荀息亦皆致命也。召忽荀息從容殉忠。不違其志。雖主仇未復。其中愍然而臣已節終。斯爲遂也。是得困之九四。曰來徐徐。困于金車。吝。有終。昔者鬻拳亦致命也。鬻拳自咎行權。別以爲戮。其情安而樂爲之。以是告無罪于先王也。是得困之九五。曰劓刖。困于赤紱。乃徐有說。利用祭祀。昔者屈原亦致命也。屈原棄于荒野。心煩意亂。不知所從。卒于沉隕。志畢而道光也。是得困之上六。曰困于葛藟。于臲臲。曰動悔。有悔。征吉。是故致命者凶。遘也。遂志者吉。稱也。以其吉稱。綜于凶遘。故凡爻之曰吉。曰利。曰无咎者。皆言乎殉義而困者也。文王取所身經著之于易。是故系困以亨。要亨于正。以其凶危。爲大人得志之事。而曰吉无咎。旣而曰天下莫不樂生而惡死也。以凶爲吉。將必有不信其言者乎。

井

井改邑不改井。无喪无得。往來井井。汔至亦未繙井。羸其瓶。凶。○初九。井泥不食。舊井无禽。○九二。井谷射鮒。甕敝漏。○九三。井渫不食。爲我心恻。可用汲。王明。並受其福。○六四。井甃。无咎。○九五。井冽寒泉。食。○上六。井收勿幕。有孚元吉。

象曰。木上有水。井。君子以勞民勸相。

儀曰。勞讀如字。民勸相者。何也。凡君子之勞民。皆以養民也。君子不能徧養民。使民相勸自爲養耳。故井所以養也。井泥不食。舊井无禽。如此殆將廢養。法宜浚泥更新。勞吾民也。井谷射鮒。不可以食。甕敝漏。不可以汲。如此亦將廢養。法宜驅鮒理甕。又勞吾民也。若夫井渫可食矣。而民不敢食。我心惻然憐之。此由其君未嘗推以予民。詔民食也。苟詔民曰。可用汲。即無不得汲而食其福者。是則王之明也。由是則其民皆自相勸。以共謀養。井甃效修。又何咎也。由是則井冽泉清。不待詔民食。民自食之也。由是則井收勿幕。惠養無方。上下相孚。大成元吉。悅以勞民。民忘其勞也。由此而言。雖有廉民。不能廢養。雖有悖民。無敢辭勞。勞出于養。民皆知勸。王者有易世。無易民。民有易主。無易業。改邑不改井者。言百王同道。未有不務養民者也。无喪尤得往來井井者。言民皆安然相勸于養而不知勞也。汔至亦未繙井。羸其瓶凶者。言民不習汲也。民不習汲。是不可勞。民不可勞。由無勸相之者也。

革

革。巳日乃孚。元亨利貞。悔亡。○初九。鞶用黃牛之革。○六二。巳日乃革之。征吉无咎。○九三。征凶貞厲。革言三就。有孚。○九四。悔亡。有孚改命。吉。○九五。大人虎變。未占有孚。○上六。君子豹變。小人革面。征凶。居貞吉。

象曰。澤中有火。革。君子以治歷明時。

儀曰治歷明時何取乎革也。昔儒以革於序四十九爲合大衍。仲尼以爲觀于象象之詞。非治歷不可當之。蓋其言之察也。初曰。肇用黃牛之革。此言歲統也。三統以寅爲正。周孔皆尊夏時。故鼎春則必革冬。鼎寅則必革丑。丑于屬牛也。詩曰。雖有牽牛。不以服箱。牛宿星紀主丑。丑土也。土于色黃。故曰黃牛。革猶言除。盡冬而歲除也。韋程云。包也。一歲之功于此包括結束之也。二曰巳也。乃革之。此言候日也。歷法主日。凡陰陽往來。馴積面變。如冬至日行最急。則必漸返遲。夏至日行最舒。爲必漸返急。因所已然。測其來氣。循此進而求之。必無差忒。故曰征吉无咎也。三曰征凶貞厲。革言三就。有孚者。此言歲差也。以日之度追乎天度。天有常數。日積餘分。不能無差。以生進退。日度歲差一於進。則四時易位。所以征而曰凶也。一於退。其所差亦如之。所以貞而曰厲也。巧歷治之。或益或損。思精法密。所操之說。三變乃成。于是可以信而行之也。四曰悔亡。有孚改命者。此言更制也。既已致精。於心無憾。於理有徵。革故著新。以成正歷。天下由之。百世所尚。故吉也。五曰大人虎變。未占有孚者。此言敬授也。定統于寅。故曰虎變。荀九家民爲虎。艮位乎寅也。曰大人者。以其事大正吉。布典告民。常候不待占驗。莫不信其必然也。上曰君子豹變者。此言置閏也。禮。君車羔臂虎植。大夫鹿臂豹植。又儀禮。王大射共虎侯。諸侯豹侯。周禮。禽作六贊。天子之狐虎皮。公之狐豹皮。公侯大夫。君之亞豹。虎之亞。猶其閏也。又大人者。聖人也。君子。聖人之亞。亦猶其閏也。舉冬杪首春以攝四時。舉歲首一閏以攝十一閏。小人革面者。言宜民也。君子治歷以精其義。小人受之以共其事。非必幽通貌守而已。

故曰革面悖之者誅。從之者順。故曰征凶。居貞吉也。是故四聖人相禪爲歷者也。孔子受歷于爻。周公受歷于象。象曰巳日乃孚者。已猶言故也。苟求其故。千歲之日至。可坐致不疑也。一歲四時。一卦四德。曰元亨利貞者。言備時也。曰悔亡者。言無遺歷也。

鼎

鼎元吉亨。○初六。鼎顛趾。利出否。得妾以其子。无咎。○九二。鼎有實。我仇有疾。不我能即。吉。○九三。鼎耳革。其行塞。雉膏不食。方雨虧悔。終吉。○九四。鼎折足。覆公餗。其形渥。凶。○六五。鼎黃耳。金鉉。利貞。○上九。鼎玉鉉。大吉。无不利。

象曰。木上有火。鼎。君子以正位凝命。

儀曰。正位凝命者。由閏得正。由浮造凝。此爲諸侯匹夫。崛起在位者言之。湯武以後。王者之事也。初曰鼎顛趾。利出否。得妾以其子。无咎。英雄始事。甯無驟失。夏臺幾危。孟津不進。亦顛也。然天下終利賴之。以出否啓泰。以其位臣僕也。以其德作民父母。國不聽命其君。家不聽命其妻。天子不能以其民。而諸侯匹夫以其民。妻不能以其子。而妾以其子。天人所歸。何咎之有也。二曰鼎有實。我仇有疾。不我能即。吉者。助譽日隆。歸附日衆。勢充德滿。如鼎饌殮。而在彼獨夫。禍深力竭。不能就我。頡之頡之。彼之曰凶。我以爲吉也。三曰鼎耳革。其行塞。雉膏不食。方雨虧悔。終吉者。此當革命之初。位正而命未即凝者有之也。鼎耳之革。其命維新。而以時方肇造。政教未治。雖令之行。猶有阻化者。雖以美

祿享賢猶有不受者。雖澤下于民。猶有未周遺漏者。要以風氣既開。治理漸出。始雖未遑。終歸大備也。四曰鼎折足。覆公餗。其形渥。凶者。此言繼世之難也。四繼三。猶鼎再世也。湯武而後。凡再世必有憂。桐宮東山其徵也。後此漢以牝晨。晉以庶孽。唐以蹠血。宋以斧聲。大命幾傾。刑誅四出。是爲覆餗刑罰也。五曰鼎黃耳。金鉉利貞者。初造之後。繼以多艱。前猷未湮。後功加厲耳。金故黃鉉。又益金底。堅致凝。建于不拔。有貞固之利也。上曰鼎玉鉉。大吉。无不利者。太平之象也。其政惇大。其世豐亨。玉之溫如。比金爲盛。在周成康。在漢文景。道和民樂。永命延世。故曰大吉无不利也。正凝爲言。義兼數世。命本於天。位副其德。彖曰元吉亨者。猶云首出庶物。萬國咸甯爾。

震

震亨。震來虩虩。笑言啞啞。震驚百里。不喪匕鬯。○初九。震來虩虩。笑言啞啞。吉。○六二。震來厲。億喪貝。躋于九陵。勿逐。七日得。○六二。震蘇蘇。震行无咎。○九四。震遂泥。○六五。震往來厲。億无喪有事。○上六。震索索。視矍矍。征凶。震不于其躬。于其鄰。无咎。婚媾有言。象曰。洊雷震。君子以恐懼修省。

儀曰。君子以恐懼修省者。于何見之。初曰震來虩虩。笑言啞啞。虩虩。狀乎恐懼者也。啞啞者。非爲喜也。心自非笑。以爲徒懼何濟。不如修省。故曰後有則其懼可賀。其笑可法也。二曰震來厲。億喪貝。躋于九陵。勿逐。七日得。喪貝至億。喪之多也。躋陵極九。躋之危也。多喪極危。急而知懼。以逐無益。退省

吾身七日來復。是其天心也。三曰震蘇蘇。震行无咎。震而幾絕。善救則蘇。修省之情。是爲生氣。故曰蘇蘇。震无咎者。存乎悔。福且將至。而何灾矣。四曰震遂泥。泥可陷也。不可沒也。濟則必迷。沒已無救。適當泥中。懼窮而省出也。又子夏曰。致遠恐泥。當修省時。盤桓躊躇。亦其象也。五曰震往來厲。億无喪有事。凶事往來。至于億億。何懼之多乎。幸而不至于喪。賴其有事修省也。上曰震索索。視矍矍。征凶。索矍者。恐懼之容也。何以救之。其躬之不遑。將助于鄰而可乎。或已不自知。而以爲无咎。其婚媾之親我者。能無責我而有言乎。修省至此。恐懼已極矣。故曰震爲雷。子迅雷必變。月令。先雷三日。以木鐸令兆民。戒其容止。故動人修省之謀者。莫疾乎雷矣。因震生懼。因懼立則。君子觀雷之德。自治爲功。由是飲食可安。禮樂逾盛。故彖曰震亨。震來虩虩。笑言啞啞。震驚百里。不喪匕鬯。天下皆知雷霆之爲功于俎豆也。

艮

艮其背。不獲其身。行其庭。不見其人。无咎。○初九。艮其趾。无咎。利永貞。○六二。艮其腓。不拯其隨。其心不快。○九三。艮其限。列其夤。厲薰心。○六四。艮其身。无咎。○六五。艮其輔。言有序。悔亡。○上九。敦艮。吉。象曰。兼山艮。君子以思不出其位。

儀曰。思不出其位。位者。就身所處。指身而位見。初曰艮其趾。无咎。利永貞。當位在趾。思亦止趾。夫趾惡其錯也。一錯則不可救。思之思之。貴乎其寡過而不易方者也。二曰艮其腓。不拯其隨。我心不快。

腓隨股動。聽命爲役。位在乎腓。宜思救之。使腓自制。是曰拯隨。不拯隨。心不快者。明乎隨拯而思止也。三曰艮其限。列其夤。厲薰心。位腰臍則思腰臍。腰臍中列而逼乎心。憂懼焦灼。及心而止爾。他何問也。四曰艮其身。无咎。位通一身。即思周一身。所求乎身者。惟无過爲盡責。苟爲趨吉求譽。君子以爲願外而不敢也。五曰艮其輔。言有序。悔亡。言之成章。輔之美也。位在輔而思守之。幸無與戎之悔。則亦已也。上曰敦艮。吉。聖人以爲不出位云者。非謂省思致約也。欲人求窮盡之耳。道理職業。百萃當前。并思于此。則其情固。所以厚止之力。惇德而造功也。是故不出位有二義焉。限乎此不出也。極乎此亦不出也。思不出其位之爲說也。又在于象之曰艮其背。不獲其身。行其庭。不見其人。方其見背。即不知有身。其身行庭。即不知有人。專壹之至也。人苟使之思背。忽及于身。使之自思。忽及于人。思何由而睿作聖。

漸

漸女歸吉。利貞。○初六。鴻漸于干。小子厲有言。无咎。○六二。鴻漸于磐。飲食衎衎。吉。○六三。鴻漸于陸。夫征不復。婦孕不育。凶。利禦寇。○六四。鴻漸于木。或得其桷。无咎。○九五。鴻漸于陵。婦三歲不孕。終莫之勝。吉。○上九。鴻漸于陸。其羽可用爲儀。吉。

象曰。山上有木。漸。君子以居賢德善俗。

儀曰。居賢德善俗。此爲君子在野者言之。魯論記鄉黨之義也。不居賢德。不可以善俗。賢德者賢人。

之德。察乎君子之居賢德者。有五觀焉。羣之以觀其不亂。飽之以觀其不素。駭之以觀其不懼。材之以觀其不廢。躋之以觀其不墮。羣之觀其不亂者。說在于初六之鴻漸于干。小子厲有言。无咎也。水涯易濡。小人易暱。不惡而嚴。讒冒勿恤。斷斷斷斷。其要無失一也。飽之觀其不素者。說在于六二之鴻漸于磐。飲食衎衎。吉也。擇石取安。擇義取飽。飲食不溇。稼穡維寶。泌洋洋。亦可以老。二也。駭之觀其不懼者。說在于九三之鴻漸于陸。夫征不復。婦孕不育。凶。利禦寇也。水陸易處。夫婦叢孽。龍戰于野。鶴鳴于垤。變生不驚。寇來自滅。三也。材之觀其不廢者。說在于六四之鴻漸于木。或得其桷。无咎也。林棲叢材。工師所度。或得之者。以棲以桷。物倚其能。世尊其學。四也。躋之觀其不墮者。說在于九五之鴻漸于陵。婦三歲不孕。終莫之勝。吉也。不飛能升。高尊無侶。身德胞功。方胎未乳。秉正自強。莫或敢侮。五也。居此五者。德之至備。以斯善俗。固不難矣。所謂善俗者。說在于上九之鴻漸于逵。其羽可用爲儀。吉也。竦身天衢。下視儕俗。有蔚苞文。以興羣。屬化鄙成都。玉帛相屬。當此之時。衆薰其德。而爲善良者。不旣多乎。鴻不亂行。漸無遽色。與鄉人處。貴乎恂恂也。故曰女歸吉。利貞。河洲居德。桃夭善家。貞女賢人。道一而已。

歸妹

歸妹。征凶。无攸利。○初九。歸妹以娣。跛能履。征吉。○九二。眇能視。利幽人之貞。○六三。歸妹以須。反歸以娣。○九四。歸妹愆期。遲歸有時。○六五。帝乙歸妹。其君之妹。不如其娣之袂良。月幾望。吉。上六。女承筐。

无實。士封羊无血。无攸利。

象曰。澤上有雷。歸妹。君子以永終知敵。

儀曰。永終知敵者。人知其一。莫知他也。凡人始見醜。不能知其終美。始見善。不能知其終惡。君子不倚始見。要終而知之。故有始不見美。要終而知其無敵者。有始不見惡。要終而知其必敵者。今夫求妹得娣。跛僅能履。既賤而醜。然而宜人富家。日趨和吉。不要其終。何由知之也。求美得眇。雖視不明。然而幽貞秉潔。家用以利。其初不知。至終而知之也。叩須者妹。而歸以娣。歸非所須。爲乖其願。然安知畜妾不吉。其終得妾不以其子也。標梅東楚。與歎愆期。烏知乎十年乃字。得其士夫。其後以爲得時也。以娣之賤。承帝姬之尊。位分已懸。聲華不敵。然而袂良月望。吉乃歸之。以爲不如。觀乎其終。愈知不如也。是故無鹽強顏。貴母一國。德操椎髻。幽襄溺陵。孤逐愆嫁。卒爲顯妻。薄呂易袂。移饗高廟。始不必休。終不必敵也。若夫維士與女。齊秀之稱也。承筐爛門。封羊奠吉。非有車賄。以謀布絲。彼都人士。謂之天合。豈期女耽難說。士貳無良。傾筐喪羊。佻儻嚔泣。其終之敵。則如此乎。君子知之。敬慎謀始。其在文王之意。以爲妹者少妹。柔曼爲容。歸以色升。豈有幸乎。深山大澤。必生龍蛇。一言蔽之。曰征凶无攸利。安知不有凶者。而文王惟曰凶无利。猶夫安知不有敵者。而仲尼惟曰知敵也。

兒易內儀以卷之六

豐

豐亨。王假之。勿憂。宜日中。○初九。遇其配主。雖旬无咎。往有尙。○六二。豐其蔀。日中見斗。往得疑疾。有孚發若。吉。○九三。豐其沛。日中見沬。折其右肱。无咎。○九四。豐其蔀。日中見斗。遇其夷主。吉。○六五。來章有慶譽。吉。○上六。豐其屋。蔀其家。闕其戶。闐其無人。三歲不覿。凶。

象曰：雷電皆至，豐君子以折獄致刑。

儀曰：折獄歸明，致刑取斷，斷必倚明，猶雷資電察，析疎周曲，之曰折也，故曰遇其配主，雖旬无咎，往有尙，威得明配，雖片言弊獄，挾旬致誅，不咎其速，惟功其敏也，故曰豐其蔀，日中見斗，往得疑疾，有孚發若，吉，幽蔽難通，心疑爲病，必取簡孚，如覆斯發，斯爲吉也，故曰豐其沛，日中見沬，折其右肱，无咎，障昏已甚，審克爲能，敬慎刑書，致詳閱實，折肱猶言腕脫，皆占再三，慎之至也，故曰豐其蔀，日中見斗，遇其夷主，吉，不得其情，此爲疑獄，罪疑爲輕，以平爲主也，故曰來章有慶譽，吉，蔽去章來，猶書曰惟明克允，以此得慶，猶書曰屬于五極，咸中有慶，以此得譽，猶書曰哲人惟刑，無疆之辭，是能化凶事爲吉者也，故曰豐其屋，蔀其家，闕其戶，闐其無人，三歲不覿，凶，乘暗決殺，昏蔽泯禁，虐威窮戮，靡有子遺，沉寃不辜，昭揭無日，亦孔之哀，是爲凶也，當世闇昧，毒民如此，文王曰：若夫時昌道亨，有

王者作民又何憂乎。以其大明爲照。如日中天。哀敬明清。宜用折獄。故曰亨。王假之。勿憂。宜日中。誠日之中。何虞斗沫。君子祥刑。雷不如電。電不如日也。

旅

旅。小亨。旅貞吉。○初六。旅瑣瑣。斯其所取災。○六二。旅即次。懷其資。得童僕貞。○九三。旅焚其次。喪其童僕貞厲。○九四。旅于處。得其資斧。我心不快。○六五。射雉一矢亡。終以譽命。○上九。鳥焚其巢。旅人先笑。後號咷。喪牛于易。凶。

象曰。山上有火。旅。君子以明慎用刑而不留獄。

儀曰。明慎用刑不留獄者。待情曰明。求詳曰慎。言以是道。權民罪有無輕重。比附其屬。貴以決速。無滯。如旅寄然。初曰旅瑣瑣。斯其所取災。此言罪小而刑輕。其過瑣瑣取災。亦如之也。二曰旅即次。懷其資。得童僕貞。此言無罪解網。還其固然。居猶其居。財猶其財。人猶其人也。三曰旅焚其次。喪其童僕貞厲。此言以重罪蒙厲刑。毀室取子。法正而事凶也。五曰旅于處。得其資斧。我心不快。此書言金作贖刑者也。曰于處者。且止踟躕也。疑赦罰鍰。鈞金取資。然聖人以爲非其本意。故心不快也。五曰射雉一矢亡。終以譽命。此言賢者蒙辜而得雪也。詩曰。雉罹于羅。射雉矢亡。雉得脫矣。罰不及善。天人歸助。令問休命。宜有終也。上曰鳥焚其巢。旅人先笑。後號咷。喪牛于易。凶。此言大罪服上刑也。焚巢之象。如曰瀦宮。喪牛之占。抑云鼗鼓。大命莫救。號咷慘哀。凶之甚也。凡此六者。赦罰懲戮。不一其

等。察麗觀中。是爲明慎。蔽之曰旅。卽知不留。取象于矢。矢躍捷急也。彖曰旅。小亨。旅貞吉。此言旅之宜獄也。蓋曰使獄如旅。庶幾小通。又曰使獄如旅。雖執之固而人猶以爲吉。此其詞哀。意亦文王戒心。美里而泫然言之乎。

巽

巽。小亨。利有攸往。利見大人。○初六。進退利武人之貞。○九二。巽在牀下。用史巫。紛若吉。○九三。頻巽。吝。○六四。悔亡。田獲三品。○九五。貞吉。悔亡。无不利。无初有終。先庚三日。後庚三日。吉。○上九。巽在牀下。喪其資斧。貞凶。

象曰。隨風巽。君子以申命行事。

儀曰。申命行事者。命以明民。申而致詳。事以圖功。行而致決。其在初六曰進退利武人之貞。進之退之。是爲申之。非不果也。謀盡而斷隨之。盤庚三誥。決于必遷。英武之資。巽以行貞也。其在九二曰巽在牀下。用史巫。紛若吉。亢詞威民。莫之能聽。巽牀卑謙。以極其說。如曰小子無良。曰幼孫爽德。于是乎再誥三誥。再誓三誓。紛若巫史。卒用耆功。故吉无咎也。其在三曰頻巽。吝。詩曰。如匪行邁謀。是用不得于道。文告日出而政事無聞。有巽無斷。斯爲吝也。其在四曰悔亡。田獲三品。此爲慮定後言。故先之曰悔亡。事之不厭繁稱者。有如田獵所獲。列品惟三。義取分羣。能無申命。幸其致審。于是乎祭祀燕饗之禮行焉。以田概凡者。田爲軍禮。事大也。其在五曰貞吉。悔亡。无不利。无初有終。先庚三日。

後庚三日。此言其所命民者。道必審正。謀必趨吉。措而行之。必其无悔有利。初艱終濟者也。先庚三日。言申命也。後庚三日。言行事也。周謀于先。告成于後。無不吉也。其在上九曰。巽在牀下。喪其資斧。貞凶。二將施命。巽牀鳴謙。上徙巽牀。命不得出。卽爲選縮。失資絀用。弃斧廢功。象曰。正乎凶。言理當取凶。不爲怪也。由此觀之。隨風之義。其挹已也小。其及物也亨。順以執言。健而決事。知柔知剛。通志成務。龍德正辭。其惟聖人乎。象曰。小亨利有攸往。利見大人。

兌

兌。亨。利。貞。○初九。和兌。吉。○九二。孚兌。吉。悔亡。六三。○來兌。凶。○九四。商兌。未甯。介疾有喜。○九五。孚于剝。有厲。○上六。引兌。
象曰。麗澤兌。君子以朋友講習。

儀曰。朋友講習。講者論說。習者循持。與我共聖賢之道者。其朋友乎。初曰。和兌。吉。和猶言無戾。無戾道亦無戾友。如是則誠淫不作。丁嚶可求。故歸吉焉。詩曰。兄弟既翕。和樂且耽。此言非和不足爲悅也。二曰。孚兌。吉。悔亡。不信道不能悅道。不信友何悅乎友。信而悅之。可與久處道。亦可與久處友。講習之功。于是日益。故吉而悔亡。詩曰。言笑晏晏。信誓旦旦。此言相悅之情。必責信者也。三曰。來兌。凶。道之來就我者。道之疑也。友之來悅我者。友之損也。如此則廢學喪朋。故占曰。凶。詩曰。終風且暴。顧我則笑。終風且霾。惠然肯來。此言悅非誠悅。來亦不終來也。四曰。商兌。未甯。介疾有喜。擇道取精。執

道取固。初告必疑。三復必喜。講習之事也。詩曰。悠悠悠悠。輾轉反側。窈窕淑女。鐘鼓樂之。此言勤思以告不甯。得朋而志喜也。五曰。孚于剝。有厲。信其害道者爲道。信其害我者爲友。雖藏修息游。皆爲危事也。詩曰。君子信盜。亂是用暴。盜言孔甘。亂是用餒。此言信其剝我者甘而說之。則敗德喪功。爲有禍亂也。上曰。引兌者。爲功于講習。微益于友朋。則德引日新。業引日富。生惡可已。爲悅之成。詩曰。自今以始。歲其有。君子有穀。詒孫子。于肯樂兮。此言以傳道延善爲悅者也。故曰。麗澤兌。君子以朋友講習。昔者文王功其四友。著于彖曰。兌亨利貞。何言乎享利貞也。亨者。嘉會也。蓋言朋友也。利者。暢發也。蓋言講也。貞者。恆久也。蓋言習也。

渙

渙。亨。王假有廟。利涉大川。利貞。○初六。用拯馬壯。吉。○九二。渙奔其机。悔亡。○六三。渙其躬。无悔。○六四。渙其羣。元吉。渙有丘。匪夷所思。○九五。渙汗其大號。渙王居无咎。○上九。渙其血。去逖出。无咎。象曰。風行水上。渙。先王以亨于帝立廟。

儀曰。詳渙一卦。知周功德之備也。享于帝立廟者。昔者先王揖讓禪受。則以郊廟爲始事。舜典正月。上日。受終文祖。卽以其月肆類禋望。而其後乃漸興禮樂刑賞之事。是也。征誅鼎革。則以郊廟爲終事。武成功成治定。武偃文興。乃始以其後四月祀于周廟。柴望大告。是也。周公陳爻。不言享祀。仲尼觀乎象詞。紀揚功德。不爽武成之言。恍然以爲盡爻所稱。殆臻垂拱。于是則可以享帝立廟矣。何以

言之也。蓋初曰用拯馬壯吉。此言與師救亂。我武維揚。猶曰祇承上帝。以遏亂略。一戎衣。天下大定也。二曰渙奔其机。悔亡。机爲格拒。所以制攻。渙而奔之。威行無敵。猶曰受率其旅若林。罔有敵于我師。前途倒戈也。三曰渙其躬。无悔。此言公其身于天下。爲天下共主。猶曰大邦畏其力。小邦懷其德。華夷蠻貊。罔不率俾也。四曰渙其羣。元吉。渙有邱。此言渙國小羣。爲天下大羣。猶曰惟其士女。篚厥玄黃。用附我大邑周。又曰列爵惟五。分土惟三也。曰匪夷所思。此言無思不服。猶曰萬姓悅服也。五曰渙汗其大號。此言發號施令。猶曰大告武成。曰渙。王居无咎。此言非富天下。猶曰散鹿臺之財。發鉅橋之粟。大賚于四海也。上曰渙其血。去逖出。无咎。此言天下大順。止殺銷兵。釋髮遠害。猶曰偃武修文。歸馬華山之陽。放牛桃林之野也。功德既昭。禮樂乃作。事天報祖。典禮行焉。是故仲尼之曰。享帝立廟者。蓋得周公之意。于所不言。然而周公亦猶本文王之言。以立其意。文王曰。渙。享。王假有廟。仲尼之說也。亦猶曰祀于周廟。邦甸侯衛駿奔走。執豆籩也。曰利涉大川。亦猶曰告于皇天后土。所過名山大川也。曰利貞。貞。正也。亦猶曰有道會孫周王發。將有大正于商也。周公引端。仲尼竟委。文王非必前知。揣量彼己。想當然爾。

節

節。亨。苦節不可貞。○初九。不出戶庭。无咎。○九二。不出門庭。凶。○六三。不節若。則嗟若。无咎。○六四。安節。亨。○九五。甘節。吉。往有尙。○上六。苦節。貞凶。悔亡。

象曰：澤上有水，節。君子以制數度，議德行。

儀曰：制數度，議德行。何？權物莫如數度，程道莫如德行。數度設，則天下不能欺以贏縮；德行立，則不能以其贏縮欺天下。以其數度言之，其制亦猶樹表于庭，以及門戶，誓曰：進此跬步，退此跬步，皆有誅也。所以初方處潛，既惟不出戶庭，爲無過咎。二漸趨躍，又以不出門庭爲有凶危。陋巷曰：賢投淵爲固，歸賢疾固，仲尼無定辭，故使顏子立春秋之數。禹稷執唐虞之度，分庭取跡，分卦取占，出入吉凶，謹爲銖黍，是故數度者，所以紀量治忽，損益禹顏，參經伍權，以應其節。一節不應，數度俱失，出疑壯趾，入懼金柅，戶門之牽，學人所歎也。故曰：不節若，則嗟若；節有兼詞，分綜器道，綜乎器則歸數度，綜乎道則歸德行。歸數度則生計算之言，歸德行則興名志之論。所以苞中爲德，託表曰行。德曰于行，猶氣亦於顏，要於立義，著稱蔽言於節也。故有道正氣完，不由於奮，此曰安節，爲體元德。聖人之行也，有志舉神出，有所慕嗜，此曰甘節，爲得利德。傑者之行也，有情尊徑異，務乎非□，此曰苦節，爲近貞德。畸士之行也，三者異量。君子議之，亨悔吉凶，辨乎其際矣。聖人以爲安，則化險，故曰亨，甘則有功，故曰往有尚，苦則多艱，故曰凶。由其自擇爲之，則亦不可悔也。故曰悔亡，苦節之凶，非爲蹈禍，節立禍隨。安甘之行，亦有之矣，惟以其情過於離跂，務爲難尚，以亢中行，此卽凶德，豈可貞乎？苦節不可貞。文王之議德行也，要必約情準道，約道準中，不失程量，以爲其功，言乎德行，數度存焉爾。

中孚

中孚。豚魚吉利涉大川。利貞。○初九。虞吉。有他不燕。○九二。鳴鶴在陰。其子和之。我有好爵。吾與爾靡之。○六三。得敵。或鼓或罷。或泣或歌。○六四。月幾望。馬匹亡。○九五。有孚攣如。无咎。○上九。翰音登于天。貞凶。

象曰。澤上有風。中孚。君子以議獄緩死。

儀曰。議獄緩死。非肆赦也。罪無原理。惟希小延。此由仁人曲念。求端設法而爲之。故曰議也。何以議之。度乎國有吉禮。則不舉刑。此可緩也。故其爻曰虞吉。或有其他饑饉災害。不甯不令。亦不舉刑。故其爻曰有他不燕。或其有子蓋愆。又或子訟親冤。號哀可念。亦將緩之。故其爻曰鳴鶴在陰。其子和之。又或以其先承重職。比于議貴。羈縻不卽死。禮也。故其爻曰我有好爵。吾與爾靡之。又或以軍與克敵。急兵緩刑。法行且止。因悲俄喜者有之。故其爻曰得敵。或鼓或罷。或泣或歌。又或以其罪雖罔赦。而惡未貫盈。卽緩致誅。不爲失法也。故其爻曰月幾望。又或以兩造之獄。其仇已亡。莫爲難者。亦可得緩也。故其爻曰馬匹亡。窮乎七者多方之議也。由其心誠求之。曲延囚繫。是乃仁術。甯有愆乎。故其爻曰有孚攣如。无咎。聖人以爲民命非細。雖甚愆微。當其怖死呼號。聲聞極天。雖法之正。猶以爲厲也。故其爻曰翰音登于天。貞凶。難曰翰音。此爲家畜。分供刀俎。豚魚亦然。人何必不死。難與豚魚。特小緩之一日生機。亦爲嘉福。文王因嘗議之。故其辭曰亨。豚魚吉。于凶求吉。在險得夷。利溥誠孚。不傷其正者也。故其辭曰利涉大川。利貞。

小過

小過亨利貞。可小事。不可大事。飛鳥遺之音。不宜上。宜下大吉。○初六。飛鳥以凶。○六二。過其祖。遇其妣。不及其君。遇其臣。无咎。○九三。弗過防之。從或戕之。凶。○九四。无咎。弗過遇之。往厲必戒。勿用永貞。○六五。密雲不雨。自我西郊。公弋取彼在穴。○上六。弗遇過之。飛鳥離之。凶。是謂災眚。象曰。山下有雷。小過。君子以行過乎恭。喪過乎哀。用過乎儉。

儀曰。道有不可過。亦有與其不及。甯小過者。行過乎恭。喪過乎哀。用過乎儉。是也。行過乎恭。何取。取諸初六。飛鳥以凶。又取諸六二。過其祖。遇其妣。不及其君。遇其臣。无咎。又取諸九三。弗過防之。從或戕之。凶。又取諸九四。无咎。弗過遇之。往厲必戒。勿用永貞。喪過乎哀。何取。取諸六五。密雲不雨。自我西郊。公弋取彼在穴。用過乎儉。何取。取諸上六。弗遇過之。飛鳥離之。凶。是謂災眚。夫飛鳥懷疾。猶人矜忽。戾天取凶。不如循牆爲恭也。詩曰。鴝彼飛隼。載飛載揚。念彼不蹟。載起載行。此之謂也。家莫尊于祖。國莫尊于君。不順于其祖。必求遇乎其妣。以謝。不得于其君。必求遇乎其臣。以請。周曲多方。冀免咎戾。詩曰。既右烈考。亦右文母。又曰。悉率左右。以燕天子。此之謂也。未流多禍。客棘爲權。无妄之災。防之甯過。莫之防。則戕之者至矣。詩曰。哀我填寡。宜岸宜獄。握粟出卜。自何能穀。此之謂也。其曰无咎。自恃无過也。其曰弗過遇之。弗肯深計待物也。如此往。必有凶。能勿戒乎。永貞。剛德也。猶憂忤物而不敢用之。故以爲恭之過。詩曰。不敢暴虎。不敢馮河。人知其一。莫知其他。此之謂也。四者皆行。

之過乎恭也。若夫密雲聚陰，西郊悲暮，人亡在穴，欲弋取之，望死者生，其情孔哀。詩曰：臨其穴，惴惴其慄，如可贖兮。人百其身，此之謂也。是爲喪過乎哀也。曰：弗遇者，猶曰我辰安在。曰過之者，猶曰昊天太憊，災眚之至，若降自天。故曰：飛鳥離凶災眚者，歲凶也。禮：歲大祲，詔殺邦用。天子素服，無樂，食不兼味，臺榭不塗，廷道不除，百官布而不列，鬼神禱而不祀，省約之至。詩曰：牂羊墳首，三星在罍，人可以食，鮮可以飽。此之謂也。是爲用過乎儉也。周公陳爻之意如此。何所取之？取諸彖曰：小過，亨利貞，可小事，不可大事，飛鳥遺之音，不宜上，宜下大吉。此言雖過而通，賴其道正，明乎其非諂交滅性，出納之吝，過小不大，如鳥小音遺下不上也。鳥音亦有過，闕關敬應恭也，嗷嗷急呼哀也，嘒嘒茶租儉也，以恭哀儉爲過，過不必無。君子以其小過爲其大美，故曰大吉也。

既濟

既濟，亨，小利貞，初吉終亂。○初九，曳其輪，濡其尾，无咎。○六二，婦喪其茀，勿逐，七日得。○九三，高宗伐鬼方，三年克之，小人勿用。○六四，繻有衣袽，終日戒。○九五，東鄰殺牛，不如西鄰之禴祭，實受其福。○上六，濡其首，厲。

象曰：水在火上，既濟。君子以思患而豫防之。

儀曰：思患豫防者，人狃形見救已然，狃形見則不思救已然。曰禦不曰防也。患由思出，防以豫名。孔子讀詩於鵲鳴歎周公之善防，傳易於既濟，發周公之知患，牖戶衣袽，惟周公尊思貴豫也。蓋初曰

曳其輪。濡其尾。无咎。當輪繫柅。未形濡患。思初不量。必當有濡。急起曳之。猶濡其尾。以濡未深。故幸无咎。苟不曳輪。濡不止尾也。二曰婦喪其蓍。勿逐七日得。蓍之未喪。患在喪蓍。蓍之既喪。患在逐蓍。思逐必益喪。亡羊補牢。勿逐謀救。以七日之力。謹微守內。非必還喪七日以往。更不喪蓍。是卽爲得于前蓍。晚于後蓍。豫也。三曰高宗伐鬼方。三年克之。小人勿用。鬼方著患也。小人幽患也。鬼方往患也。小人來患也。克敵勿喜。長亂宜思。是故高宗慎思也。恭默思道。卽得良弼。恭默思患。卽勿用小。終高宗之世。無有小人者。豫防小人也。四曰繻有衣袽。終日戒。繻繻采也。春秋紀履繻字。帛則知繻是帛也。袽。桑縑。衣袽猶曰縑袍。有繻于是有衣。因以納袽。設或無繻。何由有衣。袽于何附。如此寒患總至。能不深思終日戒者。桑蠶織績。以窮歲之力。豫三冬之計也。五曰東鄰殺牛。不如西鄰之禴祭。實受其福。椎牛修饗。言志得也。薄物致虔。言謹約也。修饗有患。虔祀得福。故曰禍生于得意。福生于謹約。訟後飲食。祭先于福。東鄰不思。西鄰能豫也。上曰濡其首。厲勢極于上。濡極于首。反是不思。防之何及。是則其智不如初也。不曳得濡。不防之尾。以及于首。不豫必困。宜其厲也。是故濟之曰既者。危詞也。以亨之小。易禍之大。必在此矣。利貞者。貴乎謹思固防也。初吉終亂。甚既于未之詞也。甚既于未何也。未有豫既無豫也。

未濟

未濟。亨。小狐汔濟。濡其尾。无攸利。○初六。濡其首。吝。○九二。曳其輪。貞吉。○六三。未濟。征凶。利涉大川。○

九四貞吉悔亡震用伐鬼方三年有賞于大國○六五貞吉无悔君子之光有孚吉○上九有孚于飲酒无咎濡其首有孚失是

象曰火在水上未濟君子以慎辨物居方

儀曰慎辨物居方者言爲物立辨不亂其居也未濟終事聖人以此明爻材而序卦位以上應乾乾之于未濟首尾也未濟曰辨物居方猶乾曰自強不息自強不息循次而上故始于潛進則見又進則惕又進則躍淵又進則在天天極悔亢終于无首辨物居方晝界而處故始于濡進則曳又進則涉又進則伐國又進則光孚光極歡飲終于濡首今夫初也者始見端者也其爲物也處卑仰上爲尾其方下濕爲濡於人性爲吝二漸通物其物利用志遠爲輪其方隅僻牽拘多慎爲曳於人爲貞於世事爲吉三世所倚其爲物也果敢好進爲征爲涉其方四達爲大川其于人事爲兼凶利四圖大履盛其物正而喜樂威而美達于人事爲貞吉爲悔亡于治國爲勝兵爲慶賞其方廣麗爲大國其應爲鬼方五位乎中其物嚴岸備乎健順於人爲君子爲貞人爲吉士其方顯白爲光爲无悔上時已過其物處尊至極爲首其方曠閒人多無事相聚爲娛爲飲酒謹者得孚蕩者得濡是故未濟之爲物甚辨而其方不易也比義求之濡由陷水比潛淵輪不免曳比見不離田涉險比終日惕震用撻伐比躍淵君子之光比飛龍大人失孚比亢悔濡首比无首故曰乾未濟首尾也乾由地之下以至于天未濟由未有濟以至于濟自未濟推而前之極于乾之上爲首自乾引而後之極于未濟

之初爲尾。故乾用言首。未初曰尾。乾首歸无則不見首。未尾歸濡則不見尾。六十四卦如環無端。是故乾龍而未濟狐也。天獸之大莫如龍。地獸之小莫如狐。龍在天忌見首。狐涉冰忌濟尾。龍見首則定爲龍。狐濟尾則定爲狐。龍不能爲狐。狐不能爲龍。皆非易之德也。故曰小狐汔濟。濡其尾。无攸利。未濟而濡。尾未成尾。不必不爲首。汔濟而濡。尾已成尾。終于尾而已。又不利乎。是故辨狐之物。而居未濟之方。宜于爻初爲尾。不宜于成卦爲濟。狐尾宜濡而濟。不宜濟而濡也。

[General Information]

书名=儿易内仪以（倪元璐）

作者=倪元璐著

页数=75

SS号=11045452

出版日期=1985年第1版